




EX-LIBRIS
DU CABINET
D'UN VIEUX BIBLIOPHILE



apud no, la paz, ucom. a 3f.



Les entretiens des Champs-Élysées (par
F. Hay du Châtelet) Lond. L. 1631
in 8.

En faveur du Cardinal Richelieu contre
les Espagnols et les autres détracteurs. Cette
pièce a été recueillie dans le recueil
notamment dans ceux de l'auteur;
mais ce doit être ici l'édition originale.
L'impression est Française, et sans
toute apparence, de Paris. L.

G. Hay Sieur du Châtelet, conseiller
d'état honoraire, membre de l'Académie
française - Né à Paris 1592 - 1636 -
Histoire de la guerre - puis pour servir
à l'histoire -

LES

ENTRETIENS

DES CHAMPS

ELIZEES.

M. DC. XXXI.

THE HENRY
LIBRARY

Case

F

39

326

631ka

M Ehan a quittede la honrra, disoit des ^{a Ils msc} Espagnols le Marquis Spinola, pres- ^{osté l'hé-} sé d'angoisses dans les tristes heures de sa ^{neur.} mort; & avec ces piteux accents s'acheminoit pour passer dans les champs Elizées. quand Caron d'une voix furieuse s'escria; *Qu'on me chasse cet Espagnol d'icy, de peur qu'il ne vienne troubler le repos des bien-heureux, cōme ceux de sa nation font toute la terre en l'autre monde;* & en mesme temps on le saisit au corps pour le ietter hors de la Barque. A quoy faisant resistance, il remonstra qu'il estoit Italien, & si fameux, qu'il ne meritoit pas d'estre traicté de la sorte: Ce qu'au lieu d'appaïser ce farouche vieillard, l'irrita davantage, luy reprochant sa lascheté, de parler le langage de ceux, qui n'ont autre dessein, que d'enchaîsner son pays & le mettre en seruitude: & cependant comme il ioignit la terre, il se desmella facilement de ceux qui ne luy voulurent faire de violence, pour le respect de son nom.

Arriuant dans des prairies voisines, les premieres personnes de congnoissance qu'il apperceut, furent les Ducs de Sauoye, & Collalto, qui disputoient ensemble sur la prise de Pignerol; l'un soustenant qu'on le pouuoit secourir, & l'autre maintenant le contraire: *Je vous accorderay bien,* dit le Marquis, *mettant l'espée à la main pour charger*

le Duc ; qui se mit en deffence, & commencerent vne furieuse meslee, sans que Colalto se mit entre-deux, à cause des coups qu'il craignoit naturellement : & si Radamante ne se fust trouué prez de ce lieu, il y auoit apparenced vn grand desordre ; mais faisant les hola, il voulut estre informé du sujet de leur querelle, fort estonné de l'inquietude du Duc, qui ne pouuoit demeurer en repos ; & commandant le silence aux assistans, accourus en grand nombre, il ordonna aux interressez de faire entendre leurs raisons.

Illustrissime Seigneur, dit le Marquis, ie ne croy pas estre blasmé de ce que i'ay fait, ayant attaqué celuy qui est en partie cause de ma mort ; pour ne m'estre pas voulu, dans le secours que ie luy donnois, gouverner selon son humeur impetueuse, bouillante & sans ordre, qui luy a causé & aux siens, d'auoir esté souuent despoüillez de leurs pays. Ie ne faisois pas difficulté de hazarder ma personne, mais bien mon armée, me confiant plus dans mon art & dans mon industrie, qu'à la fortune, ayant tousiours naturellement eu plus d'inclination à chercher vne victoire, qui se peut obtenir sans effusion de sang, que de rien commettre au hazard : par ce que quand on est sur la defen-
siue, le prudent Capitaine doit plustost temporiser & laisser consumer son ennemy dans les difficultez de faire la guerre en pays e-

stranger, que d'auenturer l'Estat avec chose si inegale, comme le gain d'une bataille, contre vn homme qui n'a rien à perdre que son armée, Et à ce propos sert la responce de ce grand Duc d'Alue, au conseil qu'on luy donnoit de combattre les François qui se retiroient de Naples: Non, non, dit-il, ie ne suis pas resolu de iouer vn Royaume avec vne Casaque de toille d'or: que portoit d'ordinaire le Duc de Guise leur General.

C'est pourquoy, me trouuant des gens belliqueux en teste, commandez par le Cardinal de Richelieu resolu de me combattre, ie fis mon effort pour l'en empescher, ne voulant pas donner à ce ieune Aiglon moyen d'acquerir de la reputation à mes despens: ce que ie luy fis entendre d'abord, & que ie me tiendrois tousiours enterre dans mes trauaux, par ce que *No queria pelear con mi hijo*, qui estoit vne alliance d'amitié, que nous auions eüe ensemble de pere & de fils à mon passage de la Rochelle: où comme avec sincerité ie respondis aux questions qu'il me faisoit: & principalement sur le suiet de ce siege, où ie reconnus bien que le Roy s'estoit engagé sur son seul auis, ie luy dis franchement qu'il auoit pris l'vnique moyen pour paruenir à la fin d'une si grande entreprise, qui ne consistoit qu'en ces deux points: L'vn, que ie voyois qu'il bastissoit son esperance par la pra-

lique qu'il en faisoit asçauoir, *Abrir la mano*, c'est à dire, despendre largement, *y serrar el puerto*. Ce qui fut cause que me voyant parler avec ceste candeur, apres plusieurs autres entretiens, nous contractames vne grande amitié, sans aucunement blesser les interets de nos Maistres; & pour monstrier qu'il la vouloit continuer, quoy que nous commandassions deux armées contraires, il me renuoya plusieurs paquets qui auoient esté surpris, sans auoir voulu en descacher vn seul; laquelle chose, bien que d'un costé elle pouuoit auoir dessein de nous mettre en ialousie, neantmoins l'effet qui en parut, fut à mon gré si ciuil, que ie ne me peus tenir de le louer publiquement, qui donna suiet à mon ennemy de se forger ceste fantasie, que i'auois quelque Traitté secret qui luy estoit incogneu: que si cela eust esté vray, ie puis dire que le succez m'en eust esté fort heureux, parce qu'il ne tint qu'à moy seul que la paix ne fut faicte, toutes sortes de conditions raisonnables m'en aiant esté offertes.

Mais la chose estoit lors bien loin de ma pensée, aussi bien que de celle de Collalto, ayans tous deux mesmes desseins sur differents lieux, luy, celui de prédre Mantoue & moy Casal, que i'auois asseuré d'emporter en quarante iours, comme i'eusse faict, sans les accidets qui me suruindrent, qui empeschèrent que ie ne me peus preua-

7
loir de l'avantage que me donna le par-
tement du Cardinal de Richelieu d'Italie, sur
les entreprises qu'on faisoit contre luy dans
la Cour de France. Et comme sa presence
m'obligeoit d'estre tousiours retranché au-
pres de luy, pour empescher ses progres,
esperant qu'encores que ie ne le peusse quit-
ter pour aller assieger Cazal, ie ne l'airois
del'emporter par la faim, quoy qu'avec vn
long temps: Aussi-tost que ie l'eus veu par-
tir, & en suite introduire la licence dans
les forces qu'il laissoit, ie creus que bien
tost elles seroient dissipees, & que partant
ie pouvois tout entreprendre. Ce qui me fit
resoudre, pour abreger le temps, de faire
l'effort necessaire pour nous redre maistres
de cette place, qui nous ouvroit le chemin
à de plus hautes conquestes. Et comme i'eus
commencé, l'enuie m'accueillit de toutes
parts. Collalto retirant ses Allemans de
mon armée, qui par ce moyen demeura si
foible, que ie fus du tout impuissant pour
l'execution de mon dessein: Et le Duc, ayant
enuoyé son Abbé Scaglia en Espagne de-
clamer contre moy, obtint, que l'on m'o-
steroit le pouuoir de plus traiter la paix,
pour le donner au Marquis de sainte Croix,
petit fils de celuy qui accommoda si bien
les François à la Tercere, duquel on fit plus
de cas que de mon experience & sincerité:
qui me fit concevoir vn tel despit, que qua-
si sans auoir de fièvre ie m'en allay à la mort.

ayant mon esprit troublé & remply de haine contre cette nation qui m'a osté l'honneur.

Ce discours finy, le Duc commença ses plaintes, sur la confiance qu'il auoit prise en ces factueuses inscriptions de la prise de Breda, *Quatuor regibus frustra conantibus*: qui le firent resoudre d'abandonner les François pour penser par là se conseruer la partie du Montferrat qu'il auoit conquise: & dans la perte de Cazal se venger du Cardinal de Richelieu, qu'il haïssoit mortellement, pour auoir porté le Roy à ne vouloir pas approuuer les oppressions qu'il faisoit & suscitoit au Duc de Mantouë: & au lieu de voir ces efforts capables de triompher contre tant de Rois, il veit au contraire ses pays saccagez en sa presence, par vn Prestre, au deuant duquel il ne fit que battre d'vne aïsse, faisant de sa crainte, prudence, pour n'oser iamais affronter vn homme ruiné dans la Court. Dequoy il auoit tres-bonne cognoissance, comme ayant intelligéce particuliere avec aucuns des principaux qui y trauailloient en France: qui luy faisoit esperer, que dans les inquietudes où il pouuoit estre, il ne feroit pas difficile de le defaire, si on l'eust viuement attaqué. Au lieu dequoy, le tēps se passoit en complimens entr'eux, pendant qu'il demeuroit deshonoré dans les accusations publiques qu'on faisoit cōtre luy, & du peu de confiāce qu'on y pouuoit prendre

dre, quoy qu'il n'eust iamais manqué de parole à ceux à qui il auoit donnee, cōme le Roy Catholique le scait, le Grand Henry, ceux de Grenoble & de Geneue, & Henry, III. mesme ne luy dēnieroit pas son tesmoignage, si la sson du Marquisat de Saluces ne l'emportoit. Que pour conclusion il voyoit ses pays desolez, traiter la paix sans luy, & en fin abandonnant du tout ses affaires s'en aller assieger Casal, laissant seulement avec luy Dom Philipès Spinola avec cēt ordre, *Denunca iamas pelear con los Franceses.* Ce qui luy donna telle rage, apres la prise de Saluces quasi emportee sur ses yeux, iointe à la perte de Mantouie, qu'une petite fievre le saisissant l'emporta en deux fois vingt-quatre heures, apres auoir fait esclater en Espagne la douleur de tous ses complimens rendus à celui qu'il hayssoit, au lieu de l'auoir chassé d'Italie avec son armee, comme il l'auoit esperé.

Le Marquis repliqua tout indigné qu'il s'estonnoit de tels discours, comme si la ciuilité estoit vn crime entre les gēs de guerre: ce qui n'estoit pas l'opiniō de Cyrus & d'Alexandre qui en auoiēt vsé avec excez enuers leurs ennemis: Et l'acte diuin de Scipiō en Espagne en la restitutiō d'un grand nōbre de Dames d'excellēte beauté, qu'il ne voulut pas mesme luy estre amenées de peur (dit vn Romain qu'il ne semblast qu'il eust cueilly au moins des yeux, quelque chose du fruiēt de leur vir-

ginité, luy auoit acquis autant de gloire que la victoire d'Annibal. Ainsi que c'estoit vne grande iniustice d'accuser des actions, qui auoient esté si dignement pratiquées par ces grands hommes; qu'on pouuoit bien nommer par leurs merites les Dieux de la guerre, lesquelles n'y nissoient pas pourtant leurs interests. Car on ne me sçauroit imputer d'auoir fauorisé les armes de France, ny au Cardinal celles d'Espagne, ausquelles il a préparé de longs exercices, qui recompenseront leur vnion en Allemagne, pour troubler les alliez du Roy Tres-Chrestien. Car par ses conseils & sage preuoyance on leur a suscité tant d'ennemis par tout, qu'il faut des siecles pour remedier à tous ces maux; Ne me pouuant assez estonner de la simplicité des Allemands dans leurs secours d'Italie, dont rien ne reuiet à leur profit, qui est tout pour les Espagnols, & le dommage pour eux; car cela obligera tout le monde d'emouuoir tous les orages qu'on pourra pour porter dans leur pays l'infortune qu'ils veulent causer aux autres. A quoy les François ne sont pas peu considerables, maintenant que le party Huguenot est ruiné, qui estoit la seule & vniue rselle ressource du Comte d'Oliuarez; qui se mocqua de moy quand ie luy dis, que s'il laissoit prendre la Rochelle il s'en repentiroit; croyant en son ame, qu'elle estoit imprenable, (comme à la verité à bon droit, elle estoit tenuë pour telle de tous ceux

qui la connoissoient. Et au lieu d'y apporter de forts obstacles, il s'amusoit à des ruzes & Traitez secrets, sur lesquels mal à propos il creut plus qu'à mes conseils, ayant pour but maruine: Et cette passion le porta de s'arrester à des gens qui l'abusoient, faute de scauoir les affaires qui requeroient en vn tel coup de partie vne bonne resolution, prompte & soudaine, qui fist effect; les fineses n'estans bonnes qu'aux affaires non pressées, qu'on traicte de loing & avec du loisir: & ne voudrois luy donner sur ce suiet vn meilleur exemple que du mesme Cardinal, à qui il en veut, lequel quand le temps requert qu'on vze d'adresse, nul hōme du monde ne luy est esgal: Mais quand les choses pressent, il ne conseille pas lors des subtilitez, mais des Armées de trente mille hommes, qui suivent leur Roy en toutes occasions où il faut aller. Et c'est ce qui rend leurs affaires prosperes, & les nostres en mespris; & si on eust esté assez habile & assez diligent de tenir tousiours les François occupez au dedans, nous estions libres au dehors; & l'Italie estoit reduite sous le joug en cette rencontre, où nous eussions sans doute pris Casal comme Mantouë, & assujety Rome & tout le reste.

Quant à ce que le Duc proteste de sa foy inuiolable, i'admire son asseurance, d'alleguer Espagne & France pour marque de sa fermeté, ayant cent fois trompé l'vn & l'autre, comme Geneve, qu'en plaine paix il

attaqua ; & Grenoble, qu'il asseuroit vouloir secourir contre l'Escliguières, & forcer le Chasteau de Mont-benaud pour leur rendre ; ce qu'il executa avec leurs canons & leurs poudres, & puis le garda pour luy. C'est encores merueilles, que pour marque de sa prud'homie il n'a allégué la Comtesse de Sault, laquelle l'appella en Prouence ; & pour recompence, il l'emprisonna, & eust couru fortune de la vie, si, vestuë en Suisse, dont elle auoit la taille, elle n'eust pris la fuite sur vn Cheual d'Espagne.

Partant, Illustrissime Seigneur, ie conclus aux peines que iugerez raisonnables, & qu'il aura meritées ; ayant prealablement fait droit à la Marquise de Riue, pour n'auoir pas publié son mariage, comme il luy auoit promis.

Radamante, parties ouyes, & voyant, qu'au fonds il sembloit qu'obliquement ils se fussent faitz mourir l'un l'autre, les renuoya hors de cour & de procez, leur faisant defense de se plus inquieter l'un l'autre. Surquoy se separans, Albigny & Cauouret, ayans tousiours la main sur la gorge, & regardant le Duc de mauvais œil, suivirent le Marquis, à la rencontre de plusieurs Espagnols & Italiens qui se firent tous grand accueil, excepté le Duc d'Alue, qui avec vn ~~vos~~ seulement caressa la compagnie ; & le Marquis prenant la parole dit qu'il venoit se joindre avec eux, pour leur dire que la cou-

stume n'estoit point changée en Espagne, de
 mal traiter tousiours ceux qui leur auoient
 rendu plus de seruices. Et là se trouuerent
 Fernand Gonzales, le Cardinal Ximenes, le
 Marquis del Vvast, Iuan d'Austria, Fernand
 Gonzague, & le Prince de Parme, lesquels
 voulurent tous ouyr le defastre de ce valeu-
 reux homme, lequel il leur raconta? Et D.
 Iuan d'Austria prenant la parole dit, Ne vous
 plaignez plus, puis qu'à moy, apres auoir
 bien serui, sans considerer ma naissance, il
 m'en a cousté la vie: Et à moy, dit le Prince
 de Parme, qui eus le commandement des
 Armees apres vous, qui sçavez le miserable
 estat où vous laissastes la Flandre, & auez
 sceu depuis en quel lustre ie remis les af-
 faires par la prise d'Anuers, qui emerueilla
 tout le monde, & qui m'eust facilité le moyen
 de reduire ces Prouinces en obeyssance, sans
 les deux voyages que fort mal à propos on
 me fit faire en France, pour recompence, on
 m'osta mespouvoirs, me renuoyant en Italie
 avec vn morceau, qui me fit passer icy dans
 la fleur de mon âge, m'ayant soupçonné d'a-
 uoir pensé à me conseruer ces Prouinces avec
 l'auen & le soustien des François. Payement
 ordinaire pour ceux qui ont bien serui ces
 gens. Je ne parleray point de moy, dit le Mar-
 quis del Vvast, parce que les François mesme
 me loient, encore qu'ils m'ayent défaiët à
 Serizolles: apres plusieurs signalez seruices,
 & auoir pour eux souillé mon ame & mon

honneur au meurtre que ie fis faire de Fregoze & Rincon, ils n'ont pas laissé pour cela de me despoiller de mes charges.

Alors le Duc d'Alue faisant trois ou quatre desmarches, & se relevant les moustaches avec cette mesme apparence d'Orgueil, qu'il auoit tousiours eue au monde, avec vn ton graue & d'indignation, dit : **Qui** est-ce qui a serui ces Princes en de plus grandes charges, & avec plus d'autorité, que moy ? **Quel** Capitaine y a il eu depuis plusieurs centaines d'années, qui aye commandé si long temps & porté leurs Drapeaux en tant de pays ? **Qui** est-ce qui ne m'a veu faire la guerre en Italie, en Espagne, en France, en Hongrie, en Allemagne, en Flandre, en Afrique ? & avec tout cela, ie fus à la grande merueille de tout le monde, sans auoir eu esgard, ny à mon aage, ny à mes seruices, confiné dans V sede, pour auoir marié mon fils, qu'on auoit emprisonné sur ce qu'õ luy vouloit faire espouser vne Dame du Palais, luy imputant qu'il luy auoit promis mariage : Et comme la resolution de la guerre de Portugal fut prise, ne scachant sur qui ietter les yeux que sur moy, on me fit escrire par vn Secretaire seulement, pour me commander que dans trois iours i'eusse à me rendre à l'armée, qui n'estoit qu'à dix mille de Madrid, où estoit la Cour, sans que iamais on me voulût permettre d'en approcher : & ce qui ne fut pas moins estrange, c'est que le Roy

faisant prester le serment par tous les Grands au Prince D. Diego son fils, il refusa de me recevoir à cette action, qui se faisoit si proche du lieu où i'estois, ny ne m'escriuit, ny ne me voulut rien dire, ny traicter avec moy sur le suiet de cette guerre, qui me faisoit plaindre de ce qu'on m'enuoyoit conquerir des Royaumes traissant mes chaines: pour montrer que le commandement d'une si grande Armée ne laissoit pas de faire voir à tout le monde, les marques de mon esclauitude. Mais cela ne m'estonne pas, puis que le Cardinal Ximenès, que ie voy-là disant son Breuiare, n'en eut pas meilleur marché, ayant conserué luy seul l'Espagne à l'Empereur, foulée aux pieds par tous les plus puissans de l'Estat, qui ne pouuans souffrir son autorité luy demandoient lettre de sa vocation, qu'il leur montra consister en ses Hommes & en ses canons, avec lesquels il remedia à tous les desordres qui se presenterent, & pour sa recompense, on croit qu'on l'empoisonna ne l'ayant peu reduire à se gouverner par l'aduis des Flamans, qu'on luy enuoyoit pour luy oster peu à peu son credit, qu'il n'employoit toutefois que pour le bien de l'Espagne & de son Maistre

Alors le grand Capitaine avec vn petit soufrire: dit: Et quoy, Messieurs vous qui avez esté des derniers, & qui avez vescu apres moy, comment est-ce que vos desastres

ont esté plustost racontez que les miens : Et qui est ce qui ne sçait, qu'apres auoir conquis vn Royaume, on m'a demandé compte de la dépençe ? Mais i'arrestay bien mes Commis-faires, quand ils virent le premier Article, qui contenoit quatre millions en espions, & auparauant ils pensoient me payer de l'honneur que i'eus de faire le quart à la table des deux Roys de France, d'Espagne, & sa femme, à Sauonne, & apres qu'il leur seroit loisible de me traiter de Traistre, qui auois aspiré à me rendre maistre du pays, & fauorise durant sa vie l'Archiduc Philippe : à quoy ie ne songeay iamais, quoy que ce fust vn tres aimable Prince, aussi sincere que son beau-Pere & sa belle Mere estoient corrompus : comme ils le témognerent bien, quand apres l'auoir engagé dans le Traitté de Blois, où il auoit accordé la Paix en leur nom, il demeura affrôté par la perte de Naples, que i'acheuay de conquerir lors, suiuant l'ordre que i'en auois de iour en iour. Et si les François eussent esté aussi cruels comme ils sont bons, ils pouuoient luy faire payer les frais d'une telle perte & ne le laisser pas aller si facilement cōme ils firent. C'est pourquoy ie n'ay pas eu tort de dire que pour m'obliger de croire vne autre-fois aux sermens de Ferdinand, ie voudrois qu'il iurast par vn Dieu qu'il recogneust, & auquel il eust croyance.

A la verité, dit le Marquis de Pesquaire, c'estoit vn grand trōpeur. Il est vray respon-

dit

pondit Ruy Gomez ; mais ne voyez-vous pas Moron, qui se moque, de ce que vous blasmez les trompeurs, veule trait que vous luy jouïastes avec Antoine de Leue ; & non-obstant vous n'avez pas laissé d'en taster comme les autres.

Alors le Prince d'Oria prenant la parole dit : L'ay esté le plus fin, car sçachant bien, qu'il n'y a point de seruices qui puissent obliger les Espagnols, & que par vos exemples ie voyois, qu'au lieu de grâtitudes & recompenses ils conceuoient des jalousies & des soupçons, qui les auoient portez à vous perdre : pour euitter cela, qui n'a iamais manqué à vn seul de ceux qui ont esté des plus renommez parmy eux ; apres l'entreprise d'Arger, que ie ne pris pas, ie rençay à ma charge de General de la Mer, contre l'aduis de plusieurs, qui me disoient que telles choses ne se quittoient iamais volontairement : & fis voir, que ie le sçeus dire & faire, & que sans eux ie pouuois viure avec lustre : car ie redoublay toutes mes depences, que iay continuay telles iusques à ma mort.

Je voudrois en auoir fait autant dit Don Ferrand. Car apres de si longs seruices rendus à cette nation, ie n'eusse pas eu la honte d'estre depossédé du Gouvernement de l'Estat de Milan, pour le donner au Duc d'Alue, qui n'y fit rien qui vaille ; & si ie n'eusse eu l'industrie de verifier la fausse escriture mise sur mes vrais seings, par l'artifice du Castellan &

Chancelier de Milan, ie ne sçay à quel point de honte & de deshonneur on ne m'eust point reduit.

Alors le Prince de Parme, plus serieux que les autres, s'aprochant de luy & du Marquis, leur dit: Nous sommes bien mal-heureux d'auoir tousiours seruy les Rois d'Espagne contre nostre patrie. Vous auez plus de raison de vous en plaindre qu'aucun, dit le Marquis: car l'Empereur Charles fit tuer vostre grand Pere, & voulut despoüiller vostre Pere, & l'eust fait, sans l'assistance des Francois.

A ce propos Ruy Gomez s'aprocha avec sa gentillesse accoustumée, excusant cette action, & disant que l'Empereur n'y auoit point de part, & que c'estoit vne conspiration de Citoyens pure & simple, qui auoit esté preueüe par vn Negromantien, qui enquis du Duc Pier Luigi de sa fin, luy fit mettre sur vne table vne teste de mort, couuerte de chandelles de cire noire, de laquelle sortit vne voix disant, qu'il deuoit estre tué, & que le nom de ses meurtriers estoit escrit dans le reuers de sa Monnoye, où il y auoit *PLAC*. qui vouloit dire, *Placentia*. Et de faict, *Palauicini*, *Landi*, *Anguiscioli*, *Conti*, designez par ces quatre lettres, furent ses massacreurs, & non pas l'Empereur.

Horace Farneze, Duc de Castre, s'estoit approché à ce discours, & prenant la parole, dit: Vous disputez tous de cette action de-

uant Dom Ferrand qui en fut l'autheur, ou pour le moins il en donna le conseil. Je n'y ay nulle part, dit le Gonzague, & de cela on ne peut accuser l'Empereur, que d'auoir approuué le fait, & gardé quelque temps Plaisance aux Mineurs, comme il se void par les quatre Vers qui en furent faits bien - tost apres, que ie porte tousiours sur moy; à cause que plusieurs m'en ont voulu blasmer: & pour ma iustification ie m'en vay vous les lire.

Cesaris iniussu Farnesius occidit heros:

Sed iussu data sunt præmia sicarijs.

Tres sunt hæredes, Dux, Margherita, Gemelli:

Hunc socer, hanc genitor, hos spoliavit auus.

Par là vous voyez qu'Ulloa, Autheur Espagnol, est vn menteur, qui escriuant la vie de l'Empereur, l'accuse d'auoir fait faire ce meurtre.

Ne parlons plus de cela, dit le Duc de Parme, l'opinion la plus fauorable des deux ne vaut rien; & pleust à Dieu que i'eusse seruy ce Prince que ie vois s'approcher de nous! i'aurois vescu plus long temps, & aurois esté mieux recompensé.

Surquoy tournant visage ils aperceurent le Grand Henry, avec vne grande suite, & luy, appuyé sur les bras de Villeroy & du President

Ianin, s'arresta sur le bord d'une grande fontaine, où soudain la Varenne arriua tenant en ses mains plusieurs paquets, qui furent deliurez à Villeroy pour les dechiffrer. Le Roy demanda cependant, Quelles nouvelles courent? I'ay ouy parler de quelques parties contre le Cardinal de Richelieu. Qu'est ce. Cela n'est rien, dit Villeroy, s'il n'est suruenu quelque chose depuis les dernieres depesches, qui portoient le desordre suruenu; & le raccommoement qui auoit fuiuy, à la grande inftacé qu'en auoit fait le Roy. I'en suis bien aise, dit le President Ianin, car ie l'ay tousiours estimé, & creu qu'il reüssiroit aux affaires; & luy ay dit souuent, qu'il prist courage, & qu'il auroit son temps; & vostre Majesté mesmes le voyoit de bon œil dez qu'il estoit Euesque de Luffon. Quoy? dit le Roy, c'est le frere de Richelieu? Il est vray que iel'aimois, & vous sçauiez bien & Monsieur de Villeroy, que i'estois résolu de le faire Cardinal, & leusse mis dans mes affaires, si i'eusse vescu plus long temps. Il y a bien reüssi, dit Zamet: car depuis qu'il est au Conseil toute la France a changé de face: & quand ce ne feroit que la Rochelle est prise & razée, il y auroit dequoy se contenter. Comment, dit le Roy, cela est-il possible, Roquelauze? auez vous entendu ce qu'il dit? Ouy, Sire, respondit-il: & qui ne le sçait pas? Et le bon sentiment qu'en montra vn homme que vous cognoissiez bien, quand il en eut la nouuelle, s'escliant, Nous sommes perdus. Il est vray.

qu'il vſa d'un mot plus ſale qui rime à cettuy-
là; mais on ne l'oſeroit dire icy. Et penſez-vous
qu'on viue à cette heure comme au temps du
vieil ſiege, où vous & les autres l'empeschiez,
& preniez autant de peine à la ſauuer, qu'on
a fait à cette heure à la prendre? Et donc les
pauures Huguenots ſont reduits à Montau-
ban, Caſtres, Millaud Niſmes, & Vzez, dit le
Roy? Rien de tout cela, Sire, dit Roquelauré;
car toutes ces places n'ont plus ny fosſez ny
baſtions: & ſur la foy du Cardinal, Montau-
ban a receu telles forces qu'il a voulu, & les a
retirées trois iours apres, n'ayant faiſt vn ſeul
logement dans les maiſons, demeurans touſ-
iours ſur leurs armes dās les places & les ruës,
ſans qu'il aye eſté pris vn morceau de pain
qu'en payāt. Je ne ſçay ſi ie dois croire ce que
vous dites, reſpond le Roy, car ie le trouue
eſtrange. Et les Seuennes, Foix, le Dauphiné,
& le Viuarets, tiennent pour le moins enco-
res? Rien de tout cela, dit le Vicomte de Por-
tes: toutes ces Places ſont Catholiques, bruſ-
lées, ou ſans fortifications. Comment bruſlées?
dit le Roy. Ouy, bruſlées, Sire, reſpond-il:
car Priuas a eſté mis en cendre, pour chaſti-
ment d'auoir eſté l'origine de toutes les ſedi-
tions, & la premiere qui aye voulu ſe deffen-
dre contre le Roy voſtre fils, depuis ſon re-
tour d'Italie. Il n'y eſt pas demeuré pierre ſur
pierre, dit le Marquis d'Vxel: car i'en ay bon-
nes relations, & qui portent que dans les
Montagnes de Viuarets l'armée y volloit, &

que iamais autre Roy n'y auoit passé: Qui a donné vn tel effroy à tout le reste, qu'Alets estant aux abois se rendit, & là tous les Deputez Huguenots y vindrent & y firent la Paix. Nous auons veu l'Edict avec merueilles, dit le President Champigny (toussant & crachant, de peur que le Garde des Sceaux du Vair ne luy reprochast encores qu'il auoit la gorge pleine d'arrestes quand il opinoit): Car tous les precedents Edicts portoient titre simplement d'Edict & Declaration faicte par le Roy sur la pacification des troubles de ce Royaume. Mais cetuy-cy porte, Edict du Roy sur la grace & pardon donné au Duc de Rohan, au sieur de Soubize, & à tous autres subjects rebelles, avec l'abolition des negotiations tant avec les Anglois qu'avec le Roy d'Espagne & Sauoye; & le bannissement des Chefs: chose qui ne s'estoit iamais veüe iusques à maintenant, qui a donné grand honneur au Cardinal, & grande fletrissure à ces pauvres Freres en Christ, qui n'ont autre consolation dans leur desastre, sinon celle de mourir de la main d'un si grand Roy.

Pour les Anglois, ie leur pardonne: car ils sont de mesme Religion qu'eux, (dit le vieux Duc de Mayenne) mais avec les Espagnols, i'en doute encores qu'on le die. Car depuis qu'ils se virent trompez à ces fameux Estats de Paris, i'ouys iurer plusieurs fois le Duc de Feria & Dom Diego d'Iuara, qu'ils ne hazarderoient iamais plus leur argent en France. Ils

l'ont fait si souuent depuis, dit le Chancellier de Sillery, qu'il ne faut pas s'asseurer en leurs sermens. J'ay veu leur dernier Traité avec les Huguenots & le Duc de Rohan, qui est bien construit selon l'humeur d'Espagne. Car il porte, Que ce que le Roy en fait, est comme estant estroitement obligé à la conseruation des Estats & Royaumes qu'il a pleu à Dieu luy donner; & à cet effect de se seruir de tous les moyens propres, licites & necessaires qui se presenteront, & le tout sans autre interest, que celuy de la plus grand gloire de Dieu. Pour à quoy paruenir il faut payer les Huguenots, pour maintenir la guerre dans le Royaume. Ce qu'ayant sa Majesté fait voir en son Conseil de conscience, composé de gens de grande integrité, il a iugé estre conuenable à la iuste defence de ses Estats, contre vne si iniuste action, comme celle que le Roy de France fait, violant tout droit & iustice (qui estoit, de ne luy vouloir pas souffrir l'oppression de ses alliez.) Et pour paruenir à leurs fins, ils offrent trois cens mille ducats pour l'entretien des gens de guerre en Prouence, Languedoc, & Dauphiné, & quarante mille de pension au Duc de Rohan, huit mille à son frere, & dix mille pour ceux qu'ils voudront gratifier: Moyennant quoy ils entretiendront tousiours la guerre tant qu'il plaira au Roy Catholique durant les iustes causes qu'il a de ce faire. Croiroit-on iamais telles choses de ces gens là, qui ne feroit bien in-

formé de toutes leurs procédures? C'en est pas la premiere fois, dit le Roy, qu'ils s'estoient voulu servir des Huguenots. Car de mon tēps ils me firent de grandes offres, & n'y voulus entendre, & nul de mon Conseil ne pensa iamais de m'en parler. C'est pourquoy ie m'estonne comme ceux-cy se sont laissez emporter à vne telle faute, & comment les Espagnols, qui font tant les Religieux, & m'ont tousiours reproché l'assistance que ie donnois à mes alliez de contraire Religion, se sont voulu charger d'un si grand deshonneur. Ils n'ont iamais fait autrement (dit le Pere Cotton) car ils ont tousiours eu la Religion dans leurs levres, & rien moins que cela dans le cœur. Vostre Majesté protegeoit les heretiques, non comme tels, mais comme ses alliez, que par honneur & par la iustice des Traitez vous ne deviez pas laisser perdre ny empieter, afin de vous conserver l'affection de tous ceux qui sont attachez avec la Couronne: & puis, n'est-ce pas impieté, de croire que les Princes heretiques ne soient pas Princes legitimes dans leurs Estats, & que la diuersité de croyance empesche le droict de proteger ceux auxquels on l'a promis, quand on veut vsurper leur bien? C'est vn poinct delicat que vous traictez là, mon Pere (dit le Cardinal de Berrulle) & croy qu'il vaut mieux n'en parler point du tout: car il y a penchant de tous costez. Pourquoy Monsieur, (dit le Pere?) Salomon ne bastit-il pas le Temple de Dieu avec l'aide des

des Tyriens idolatres, & les Machabées, qui estoient aussi gens de bien que nous? Perdirent ils leur reputation, pour s'estre alliez avec les Romains? Mon Pere, n'en parlons plus (dit le Cardinal) vous sçavez bien que le Roy de Iuda fut blasmé par vn Prophete, de s'estre alié avec le Roy de Syrie. Non pas de l'alliance, dit le Pere, mais de sa trop grande confiance en ce secours, comme en sa maladie en celuy de ses Medecins, qui ne fit pas pourtant condamner la Medecine. Partant ie persiste & dis, que pour se defendre & ses alliez, il est loisible de se servir de tous moyens licites & possibles, & de ceux mesmes qui ont esté aux siecles passez pratiquez par les Espagnols, qui sont tant les scrupuleux.

Mon Dieu, dirent en souspirant le Greffier Senault & Chassebras, les Espagnols nous ont tousiours semblé si bons Catholiques, que pour mourir ils ne voudroient pas auoir aucune communication avec les Heretiques, suivant le dire de l'Apostre, *Nec dixeris eis Ave.* Vous l'entendez, replique le Pere: Et Ferdinand Roy d'Espagne, par le conseil de Roderic, ne se seruit-il pas des Mores pour se defendre contre le Pape, le Concile, & l'Empereur Henry second, par le moyen dequoy il se garantit de la sujction de l'Empire, où l'on le vouloit reduire? Et que direz-vous de cette horrible alliance d'Aurelius avec les Mores, leur payans tous les ans cent ieunes filles de Tribut? Et l'Empereur Charles, pour parler

des temps voisins, à la prise de Rome, n'auoit-il pas huit mille Lansquenets Protestants, qui commirent toutes sortes de sacrileges & d'impietez aux Eglises & choses sacrées par l'espace de sept mois, qu'ils tindrent le Pape Clement assiégué dans le Chasteau S. Ange avec tous les Cardinaux? Et ne sçavez vous pas, dit le Cardinal de Peleuë, que ce pieux & tres-pieux Empereur en prit le dueil, & fit faire processions generales en Espagne, lors qu'il sçeut sa deliurance? Et vostre Eminence ne sçait-elle pas, dit ce bon Pere, que c'estoit se moquer de Dieu & des hommes? que c'estoit luy qui le tenoit prisonnier, & qui ne le mit iamais en liberté, qu'apres luy auoir fait payer huit cens mille escus, & puis il en solemnisa la feste? Mais que dis-je, ou que ne pourrois-je dire sur ce sujet? Ce mesme Empereur ne fit-il pas ligue offensive & deffensive avec Henry huitiesme d'Angleterre, qui auoit renoncé sa foy, & repudié sa Tante, pour espouser la Garce; & cela pour auoir plus de moyen de ruiner la France?

Ne fit-il pas vn autre braue trait, de prendre & se seruir des Galleres du Pape pour re-stablir Mulleassen, Mahumetiste, dans Tunis, qui en auoit esté chassé par Barberousse, Mais son fils Philippes second, en tout le reste de ses actions vn des plus sages Prince du monde, à quoy pensoit il, quand il abandonna ses subjects naturels à la mercy des Heretiques, qu'il estoit obligé par droit diuin & humain de

conseruer, & d'en rendre bon compte deuant Dieu, pour venir faire la guerre en France, où il n'auoit point d'interest, & despendre son argent ailleurs, & laisser perdre ses pais? Et cette coustume est la raison, pour laquelle on se bande contre cette nation, à l'imitation des autres Rois d'Espagne, qui s'vnirent tous contre Alphonse 8. Roy de Castille, faisant la guerre aux Mores, pour ne le souffrir pas s'accroistre & se rendre trop puissant.

Demandez à l'eminentissime Cardinal d'Osat, s'il n'escriuoit pas autrefois, qu'il ay-moit mieux les Espagnols dans les Pays-bas vieillissans, harassez, blessez, & meurtris, que non pas de les voir dans les costes de France, puis que c'est leur humeur de ne laisser pas le monde en paix? Je croy que pour le salut des Estats il ne faut pas toujours attendre que Dieu face des miracles, & qu'il est permis de se seruir des moyens qu'il a donnez pour se defendre contre les vsurpateurs de son bien, ou de l'autrui.

Au moins ne desauoüerez-vous pas, dit le celebre Bussi le Clerc, que l'Allemagne & le sainct Siege ne soient fort obligez à la maison d'Austriche: car sans elle il n'y auroit plus ny Pape ny Religion. Vous me pardonnerez, respond le Pere: car s'ils en eussent esté creus, ils auroient esté maistres absolus de l'un & de l'autre. C'est pourquoy le Pape & les Allemans sont les plus interessez de s'opposer à la grandeur de cette Maison, qui ne pretend qu'à

mettre bas le premier, pour en disposer à sa mode ; & abolir l'election des Empereurs, pour se rendre l'Empire hereditaire. De là est venu que vous auez veu tant de guerres collorees de Religion, & les Papes si souuent mal menez & outragez en leurs personnes & en leurs seruiteurs : & sans parler de tous, j'allégueray seulement Frideric II. qui à la persecution y adioustoit la risée, quand ayant par ses adherans fait prendre sur la mer trois Legats du Pape, & plusieurs Prelats, comme on enuoya vers luy sçauoir ce qu'il vouloit qu'on en fist, il mit seulement au bas de la lettre qu'on luy escriuoit ces deux Vers.

Omnes Prelati Papâ mandante vocati,

Et tres Legati veniant hucusque Legati.

La memoire de cette action jointe à plusieurs autres, deuroit tousiours faire trembler les Papes, & considerer que l'Empire estant en vne famille si puissante, engendre cette crainte vniuerselle de tous les hommes, qui maintient le Schisme, rend l'alliance des Princes Schismatiques necessaire, & fait qu'il est difficile de voir iamais la paix en la Chrestienté.

Et quoy que le Roy eust pris grand plaisir en cette digression, neantmoins l'impatience le prit d'entendre la lecture de ces Lettres, qui luy fut faite par Villeroy: lequel pour en faciliter l'intelligence, prit l'affaire de plus haut, &

parla de ce passage admirable des Alpes que son fils auoit fait, & forcé le Pas de Suze; que la forteresse luy auoit esté renduë; qu'il auoit secouru Cazal & traité avec le Duc de Sauoye, pour conseruer la liberté d'Italie, & empescher l'oppression du Duc de Mantouë: En suite, dequoy estoit suruenüë la ruine des Huguenots, & la Paix: & parce que tout cela auoit esté contredit par aucuns deuots pretendus. Le Cardinal de Richelieu demeura ferme en son aduis avec le Mareschal de Schomberg, que l'euénement a faict voir le seul & vnique qu'il falloit suiure; & neantmoins cela luy a causé la haine de plusieurs, qui firent tant par leurs artifices, qu'il fut traité comme nostre Seigneur. Car par tous les chemins où il passa, les peuples les remplissoient de Rameaux, & bien-tost apres on le voulut crucifier.

Après cela, pour faire la guerre ou la Paix, on iugea que sa personne estoit necessaire en Italie, ayant à faire avec Spinola, & au Duc de Sauoye, inconstant en ses desmarches, & qui vouloit faire le neutre au commencement: mais comme on le pressa de parler clair, on le veid en vn instant se declarer ennemy de la France: qui fut cause que, sans temporiser davantage, on s'alla loger sous Pignerol, qui fut emporté en ynze iours, ville & Chasteau, à la barbe des Espagnols, Spinola, Collalto, & le Duc, y estans en personne. Quoy? Pignerol est entre les mains de mon fils: cette place si necessaire pour les entrees en Italie? Il me sou-

vient que lors de mon grand dessein, i'auois donné charge à Bullion, duquel ie me seruois fort, de n'accorder rien avec le Duc de Sauoye, qu'en me donnant pour seureté cette place, que ie tenois fort importante; Et pour laquelle auoir rendue vn peu legerement, le Roy mon predecesseur fut fort blasmeé autresfois.

Mais il y a bien plus, dit Villeroy: car on a fortifié Briqueras, emporté les Forts des Val-
lees, Auigliane, Saluces, toute la Sauoye, excepté Mōtmellian qui ne se peut secourir, battus les Espagnols aupres d'Auigliane, à Carignan, & fait leuer le siege de Casal; sans le soucier des protestations qu'vn certain personnage faisoit, delarant qu'il n'estoit point de cet auis, puis qu'ils scauoient le Traicté fait à Ratisbonne, lequel il valloit bien mieux suivre, que d'aller hazarder leur vie & la reputation des armes du Roy, en vn voyage qui de soy estoit impossible, & plein de tant d'inconueniēs, que le profit qui en pouuoit arriuer estoit si petit au prix, que c'estoit temerité & tres-mauuais conseil d'entreprendre d'vser de force pour vne chose qui estoit ailleure & entre leurs mains.

Mais le Mareschal de Schomberg, qui est de vostre nourriture, qui fut fort bien secondé de ce braue viellard le Mareschal de la Force, considérant la gloire qui s'acqueroit en secourant cette place, le bien qui en reuenoit au Roy, couronnant par là toutes ses actions passées, qui perdoient autrement beaucoup de leur

lustre, & les serments faits sur ce sujet au Cardinal de Richelieu, qui eust encores entrepris ce voyage & commandé l'armée pour le secours, sans les machines de la Cour cōtre luy, & se voyant mis en la place de son plus cher & meilleur amy, a esté si heureux, que d'auoir executé ce qui sembloit impossible aux Espagnols & a plusieurs autres, qui ne croyoient iamais, que dās vn pays ennemy on peut conduire vne armée, & la nourrir pour le temps qui seroit necessaire a cette entreprise. Il surmonta neantmoins toutes ces difficultez sur la terre, comme celles de la mer au secours de Ré contre les Anglois, qu'il deffit si brauemēt, qu'il se peut vanter d'auoir acquis la gloire des deux plus belles actions que Capitaine aye fait depuis cinq cens ans en France.

Ce Cardinal l'entend (dit le vieil Marechal de Brissac) d'agir ou faire agir avec telle resolution. Car contre les Espagnols il n'y a que d'estre hardy, comme ie l'ay pratiqué commandant des armées en Piedmont, où du commencement que Ferrand Gonzague vint contre moy, il brusloit & rauageoit tout. Ie le requis de bonne guerre sans qu'il me voulut ouyr: ce que voyant, ie fis comme luy, & en mēsmē temps il me demanda ce qu'il m'auoir refusé. Mais ie trouuay bien plus plaisant, quand le Duc d'Albe fut mis en sa place, qui arriua en Italie avec vn son de brauades & de menaces, qu'il sembloit qu'il deust tout foudroyer. Ses apparats furent pompeux. Dans la

seule ville de Milan il fit vne leuée de huit cens mil escus, vne nouvelle fonte dans le Chasteau de trente canons, fait publier vne leuée de neuf mille beufs pour ses Charrois, fait faire nombre de bateaux portatifs, fait venir d'Allemagne par le Lac de Garde des milliers de caques de poudre, comme aussi de Gennes & Naples, & bien qu'il eust vne armée de trente mille hommes & cinq mille cheuaux, equipage de quarante canons, & assignation pour l'armée, de si mois, il publioit hautement de nouvelles leuées de dix mille Italiens, & autāt d'Allemands: ce qu'il faisoit pour faire peur, & donner esclat à la grandeur de son Maistre. La fin de cela fut, que ie luy enleuē Vulpian, place importāte à nos affaires, & qu'il s'alla eschoüer deuant Santia, lieu incogneu, que i'auois fortifié: où ayant perdu beaucoup de gens, ie l'en fis desloger avec tant de desordre, que laissant Sigismond Gonzague dans les trenchées avec neuf Compagnies de son Regiment, & tous les Marchands & Viuandiers, il nous donna moyen de faire bonne chere sans nouvelle despence, & sans plus sejourner, quitta le Piedmōt, & s'en alla au Royaume de Naples, cōtre le Duc de Guise, qui eust mieux faict de croire mon conseil, d'acheuer le Milanois qui nous estoit facile, & puis le reste estoit entre nos mains. Je redis encore, qu'à l'endroit des Espagnols, il n'est que d'y aller la teste baissée: on les trouue souples, pourueu qu'on ne les marchande point, comme ie voy qu'a fait ce Cardinal,

dinal, qui a beaucoup de cōformité avec moy & principalemēt celle là, d'estre fidelle à son maistre, & tousiours traucté comme ie l'ay esté par mes ennemis, qui comme les siens ont mieux aymé hazarder de tout perdre, que de laisser faire le bien.

On escrit, dit Villeroy, suivant ce que dit Monsieur le Marechal, que toutes ces menées ont faict vne grande playe à la France: car elles firent partir le Cardinal d'Italie, où son Armée, qui auoit vescu avec ordre & grande discipline, faisant payer & chastier, se licētia à mille desordres, en fin tout se dissipa par son absence: & par la propre confession de Spinola, s'il eust demeuré, Cazal n'auroit point esté assiegé, ny, peut-estre, Mantotie pris. Car les Allemans estans contrains par la presence de demeurer tousiours vnis & ioints avec Spinola, ils n'auroient pas eu la liberté de retourner à cette entreprise si malheureuse & si facilement executée: & cette nation s'estant portée si insolēment contre les alliez de la France, fait bien voir son ingratitude. Car si on n'eust point appaisé les troubles qu'ils auoient, & laissé faire Bethen Gabor, il eût secouru la Boëme, auquel cas ils se seroient trouuez tellement occupez, qu'ils n'auroient pas eu le moyen d'aller au sac de l'Italie.

Mais en fin à quoy aboutit cet affaire du Cardinal, dit le Roy: Qu'on la voulu esloigner de la Cour, dit Villeroy. A cette parole

tous les assistans firent vn cry, avec vn Iesus, les mains jointes, qui fut entendu de toutes les campagnes voisines, monstrans par là l'estonnement d'une telle nouvelle, qui attirera beaucoup de gēs, les vns dolents, & les autres qui s'en resiouyssoient. Le Cardinal Polus dit en son Anglois, que Buquinkan voudroit auoir donné cent mille liures Sterlins & qu'il fust par terre. Le Duc de Lerme replique: cela n'est rien, car D. Iuan de Villela m'a dit, que l'Oliuares en donneroit deux millions d'or, parce qu'il a perdu ses escrimes contre luy, avec grand peril des Estatss de son Maistre. Ses fougues estoient bonnes contre moy qui estois vieux, & mes enfans foibles & de peu d'esprit, & tous ensemble hors de la faueur que nous auions eüe mais contre vn grand Royaume, qui a vn ieune Roy belliqueux, assisté de bons & fidelles Ministres, luy qui n'a iamais sorty du pays, ny veu ny guerres ny affaires, pensoit-il que toute la terre deust obyr à sa fortune? Il s'est trompé, & se trompera tant plus Il ira en auant. Il a faict breche à l'honneur d'Espagne par les vsurpations iniustes qu'il a entreprises, qu'il a faillies, & ausquelles il ne cessera iamais de traualler pour reparer sa faute, qui se fera tousiours plus grande, & en fin le ruïnera. Car comme on sera lassé de ses desordres, on l'accablera. Et comment s'en pourroit-il garantir, puis que i'ay faict naufrage, moy qui

estois aussi doux qu'il est turbulent ? qui n'auois autre but que de maintenir les deux Couronnes en paix pour conseruer nos Indes & maintenir la guerre en Flandres contre les maudits rebelles & mescreans ? On a veu comment de mon temps les choses sont al-
lees avec prosperité : & depuis que cét estourdy gouuerne, on voit au contraire les Indes rauagées. Les Heretiques qui ont quasi tousiours tenu la campagne, pris les places imprenables de mon temps, & avec cela il a esté si peu sage, que de resueiller la guerre en Italie, que i'auois tousiours empeschee, quoy qu'il y eust le Comte de Fuentes assez mal aisé à gouuerner, qui ne demandoit autre chose par les bons conseils que luy donnoit le Duc de Sauoye : mais ie tenois la chose si perilleuse, que ie m'y suis tousiours opposé, pour estre bien plus aisee à commencer qu'à finir, comme on le verra à cette heure que les François y ont pris pied, qu'il sera bien difficile de leur oster, estant à craindre qu'ils ne vueillent laisser là tousiours vn os à ronger aux Espagnols, qui les reunira à la fin

C'est pourquoy ie croyque non seulement Oliuarez voudroit donner deux millions, mais quatre, & qu'on l'eust ruiné, de crainte qu'il ne le face perir : parce qu'il est si heureux, que tous ceux qui luy sont contraires perdent la vie, comme Buquinkan, le Duc

de Sauoye, Spinola Collalto, & plusieurs autres. Et luy mesme a desia eu quelque secouffe : qu'il prenne garde à luy, car il n'y a point de sagesse contre la fortune.

Après l'estonnement passé de tous, le Roy demanda si c'estoit son fils qui auoit voulu si mal recompenfer vn tel seruiteur ? Non Sire, dit Villeroy, au contraire il l'a soustenu. La chose vient d'ailleurs. Mais le bon que i'y vois pour luy, c'est qu'on l'a attaqué dans son fort, c'est à dire dans vn temps que tout le monde disoit du bien de luy, & avec raison, veule les grands seruices qu'il venoit de rendre, & les bonnes intentions qu'il ioignoit à celles du Roy, de biē-tost faire leuer & oster la plus part des pesants fardeaux dont le pauvre peuple est chargé & sur tout de faire bien tost esclorre ce bien dans la bonne ville de Paris. Car si la chose eust esté autrement, ie crois qu'il luy fust arriué comme à Aristides, de souffrir du mal pour estre homme de bien, scachant de bonne part qu'il est tel, & qu'il craint Dieu, auquel il a la mesme confiance de Iob, quand il disoit *Pene me inxtate, & cuius vis manus pugnet contra me.*

Je loue mon fils, dit le Roy, de l'auoir maintenu : car s'il l'eust abandonné, il perdoit tout son credit, & n'eust iamais trouué homme qu'il eust voulu seruir : & de plus, il estoit à recommencer : car il est le maistre maintenant, où n'ayant plus vn tel Ministre

il eust bien eu des affaires à desmesler. ne co-
gnoissant point d'homme à mettre en sa place
& quand il en auroit, auant qu'il y fust ac-
coustumé comme avec cettuy-cy, son
Royaume & ses affaires seroient en grand
desordre, veu que tous changemens de
telles personnes sont tres. perilleux. C'est
pourquoy ie croy qu'on ne le pouuoit laisser
aller, car il estoit trop necessaire.

Cen'est point necessité, Sire, qui le fera re-
tenir, dit le President Ianin: c'est amitié. Car
ie sçay bien que le Roy l'ayme, & doit bien
haïr ceux qui auoient faict cetté menée. Et
qui sont-ils dit le Roy? Marillac en est vn,
Sire, dit Villeroy, qui pour payer le Cardi-
nal de l'auoir eslué, l'a voulu ruiner, ne se
ressouuenant plus qu'il auoit vescu sous le
Chancelier de Sillery, sans auoir iamais eu
autre commission de luy que de dresser les
bancs & les escabelles aux Estats de Nantes,
& de visiter les écrits de Seruin. Attendez,
dit le Chancelier de Sillery, il en eut encore
vn autre: Mais ie veûx que vous sçachiez au-
parauant, qu'avec sa pieté, apres ma disgrâce
à Tours, à la table du sieur Mangot qui eust
ma place, & ne la garda gueres, il medisoit de
moy publiquement, & dès que ie fus remis,
il ne laissa d'estre des premiers à se trouuer en
mon cabinet: & le soir comme on me pen-
soit donner cét aduis comme vne nouuelle,
ie respondis que ie le sçauois bien, mais qu'il

falloit laisser telles choses comme les pierres
 dedans les mauuais chemins, lesquelles si on
 vouloit toutes ramasser, on succomberoit
 sous le fais, qui estoit cause que ie n'en voulus
 faire compte. Or ce que ie vous voulois dire
 est que sous le pretexte de certe deuotiõ que
 vous sçauiez, il songea à vne affaire que ie cõ-
 fesse qui me fit rire, me proposant de r'allu-
 mer vne lampe fondee par Charlemagne à
 à Aix la Chappelle (notez cela) qui au grand
 deshonneur du Royaume estoit esteinte de-
 puis quelque temps: ce qu'il fit sonner si
 haut, que pour l'appaiser & contenter son
 zele, ie luy donnay encore cette commission.
 Mais ce qui fut bon, & dont ie ne memessay
 pas, c'est qu'il trouua moyen sur ce sujet de
 ce faire donner quatre mille escus pour les
 employer (disoit-il) en ornemens, qui obli-
 geassent les Chanoines de r'allumer ce feu
 qu'ils auoient laissé esteindre. Dequoy tous
 se mirent à rire. Et apres, Villeroy reprenant
 la parole, dit: On le tira en fin des Maçons
 des Carmelines pour le faire Surintendant
 des Finances & Garde des Seaux, & avec sa
 beatification supposee, ne pouuant assouuir
 son ambition, il voulut faire ruiner son bien-
 facteur pour prendre sa place: au lieu dequoy
 il a esté chassé, son frere emprisonné, & sa re-
 putation diffamee. Et dit-on, qu'au mesme
 lieu où il auoit si long temps exercé son hu-
 milité, la resolution fut prise d'executer ce

qu'il auoit conseillé de faire, qui fut remarquée par vne Dame s'estant trouuée là, qui dit en passant, ou par congratulation de ce grand ouurage, ou craignant peut-estre de perdre au change, Dieu vous doint bien faire sans auoir eu autre responce de Beate, qu'un petit soufris. Sardonique, avec lequel ils s'en alla fort gay, pensant que dans trois iours il seroit le seul Gouverneur de l'Estat. Il ordonnoit pour les Finances d'Italie, qu'elles seroient mises entre les mains de celuy que son frere nommeroit, donnoit les heures des conseils particuliers qu'il auoit à tenir avec certains confidens, & declara pour dix ou douze iours de suite, ce qu'il auoit affaire. Et ayant veu des le Dimanche l'orage commencer sa joye, & son orgueil redoubla en sorte, que le Cardinal l'ayant enuoyé conuier de passer à son logis auant d'aller chez le Roy, il s'en excusa, pour auoir pris medecine, & neantmoins le Cardinal arriuant à Luxembourg, où la Reine logeoit, il le trouua dans vn petit cabinet seul, & luy dit seulement! Ho, Monsieur, vous voila! & vous disiez que vous estiez malade? & passant outre, s'auançoit pour parler au Roy. Et luy voyant tant d'allees & venues, commença avec vn soufrire dedaigneux de demander à vn, qu'il fit seoir aupres de luy, qu'est ce cy? il y a quelque chose: dites moy que c'est? pensant lors en son ame auoir la victoire entiere, ce

qu'il creut mieux encor, lors qu'il sceut les discours tenus au Cardinal, qu'il creut estre sans resourse, quand il le vit partir, & qu'on luy commanda d'aller à Versailles pour, selon son aduis, prendre possession de l'Empire; mais quand il y fut arriué, & qu'on le logea à Glatigny, le Cardinal dās le Chasteau, alors il cogneut qu'il estoit bien loin de son compte, qu'il auoit à faire à gens plus fins que luy, & qu'il estoit perdu. Ce qui l'obligea d'escrire cette belle lettre qu'il donna le lendemain à Lomenie; qui luy vint demander les Seaux, par laquelle il donnoit, comme Harlequin, congé à son Maistre. Par le Corbieu, voilà vn mauuais homme, dit le President Ianin, & qui a vsé en tout cela d'une grande perfidie: *Perfidia tantum incommodè humano generi adfert, quantum salutis bona fides præstat.* dit le Garde des Seaux du Vair, s'estonnant comment le Cardinal de Richelieu auoit procuré tant d'honneur à cét homme. Et moy encores plus, dit le Roy, qui me fait bien rabattre de la bonne opinion que i'auois de luy, Sire, ne le prenez pas là, dit le President Ianin, les pl^s fins sont attrapez par ces papelards, qui fōt les chatemite, & sous pretexte de deuotiō vous dōnent de la griffe. Et nostre Seigneur ne no^s aduertit il pas de nous garder de ces *loups qui viennent avec des peaux de brebis*? Ces paroles signifient
le

le peril qu'il y-a en telles gens, & que pour s'en garentir il ne falloit pas vn conseil moindre que celuy de Iesus Christ, lequel fut aussi vendupar vn de ceux qu'il auoit choisis : & comme il scauoit bien qu'il conspiroit contre luy : aussi le Cardinal scauoit, il y a deux ans & plus, ses menées: mais sa patience & sa bonté, à l'imitation de son maître, luy faisoient dissimuler, esperant qu'il s'amenderoit : & le Roy mesme declara à Messieurs du Parlement, qu'il l'eust chassé il y a long temps sans luy.

De mauuais œuf, mauuais Corbeau, dit le Cardinal du Perron. Que pouuoit on esperer en la vicilleffe d'un homme, de qui la ieunesse a esté passionnee contre l'Estat. J'ay aimé le Cardinal de Richelieu comme moy-mesme, n'ayant iamais cogneu de son sage aucun qui eust vn genie si puissant pour l'Estat, ny si fort contre les Heretiques. Mais ie passe condamnation contre luy, d'auoir choisi cet homme pour amy, sans consulter le vray original des bons François. Le President de Thou, qui escriuant l'emprisonnement du President de Harlay, que voila grondant, pensant qu'on luy demande audience, met que Bussi estoit chef de ceste execution, *scilicet Marillac, & alij, cruenta religione imbuti*. Ouy, repliqua Teuin, mais il n'a pas mis la peur qu'il me fit, quand à la mesme heure venant dans la cinquiesme Chambre des Enquestes, de laquelle i'estois : ie me

chay sous des fagots auprès de la Beuette, & l'entendois iurant le Nom de Dieu, le poignard à la gorge de Maître Pierre nostre Beuettier, le menaçant de le tuer, s'il ne luy disoit où i'estois : & bien me prist qu'il ne me decela pas : & à Fortia d'auoir de bonnes iambes pour s'enfuir, car il luy en vouloit aussi bien qu'à moy : & s'en est tellement souuenu, qu'il ne l'a iamais voulu veoir au visage depuis qu'il fut esleué en ses dignitez, se le représentant tousiours avec la furie de ce iour là, maugreant & reniant Dieu comme il faisoit.

Il faut oublier le passé, dit le Cardinal de Berulle, & n'y songer plus : c'est vn bon homme & pieux, qui ne blasphema iamais. Il l'auroit mieux excusé, dict Seruin à l'au-reille de Gillot, s'il eust reparty comme le Cardinal de Richelieu à son Capitaine des Gardes, qui se plaignoit d'vn Prelat, de ce que sur vn refus qu'il luy auoit faict, il auoit aussi iuré le Nom de Dieu, vous vous trompez, repliqua-il, Iesus, & Dieu, c'est la mesme chose, il a seulement pris l'vn pour l'autre : & puis esleuant sa voix, il dit, Monsieur, pourrez vous nier que cet homme n'aye esté vn des plus grands ennemis de nos deux derniers Roys ?

Ha ! Monsieur estes vous là, dit le Cardinal ? Vous estes suspect en ceste cause, car vous n'avez iamais esté d'vn mesme aduis sur nos priuileges de l'Eglise Gallicane.

que vous estendiez vn peu plus qu'il ne fal-
loit, & sur vostre *sanctum secularé*, que
vous tiriez de S. Paul par les cheueux, pour
faire nos Roys Papes: & puis il vous a vn
peu testonné sur vos conclusions que
vous auiez prises contre certains liures,
où il vous lauoit bien la teste. Monsieur,
dit Seruin, i'ay tousiours esté bon Fran-
çois, & me suis volontiers opposé aux
entreptises faictes contre la Couronne:
c'est pourquoy il escriuoit contre moy,
& qu'il fist imprimer son pernicieux Exa-
men, où il assubiectit la Royauté sous
d'autres puissances, suivant les anciennes
maximes de quatre vingts neuf, qui ont
engendré tant de malheurs à la France,
& lesquelles i'ay tousiours combatues com-
me damnables & contraires à la seureté des
Estats. Non que i'aye voulu oster les Roys
du bercail de l'Eglise, & les rendre Pasteurs
au lieu de brebis: mais bien ay-ie tousiours
dit, qu'il falloit de grandes considerations
deuant que de venir aux excommunications,
à cause du rang qu'ils tenoient, & des con-
sequences perilleuses qui s'en pouuoient
ensuiure; mais que routefois si la nécessité
force d'en venir là, que pourtant ils ne doi-
uent pas perdre leur bien ny la fidelité &
obeyssance de leurs sujets. Je prendray
Monsieur Gillot pour tesmoin de ma con-
science, que i'ay tousiours eue nette sur cette
matiere, aussi bien que luy sur celle du Con-

cile de Trente, lequel il n'a pas eu dessein d'invalider, comme on luy a imputé: mais seulement a voulu faire voir la disposition du siecle de son temps, qui souspiroit vne bonne reformation; & sur tout d'oster le Celibat & le Careme, comme contraires au genre humain.

Il est tousiours luy mesme, dit le Cardinal, diuagant & sautant d'une matiere à l'autre. Vous souuenez-vous quand vous plaidiez la cause d'une femme qui auoit enleué son mary de la potence, que vostre conclusion fut contre le Cardinal du Perron, que le Concile estoit par dessus le Pape? Sur quoy Seruin s'eschauffant dit: le reprendray mon discours & prouueray disertement ce que j'ay dit, & nul ne me niera qu'il n'aye signé le serment horrible qui se fit contre Henry troiesime, qu'aucuns afferment auoir fait de son propre lang, & qu'il estoit de ce conseil, duquel Monsieur de Neuers a dit il y a quarante ans, *† Ils se resolurent de forger un Conseil à Paris de quelques personnes choisies à leur poste & deuotion pour ordonner & disposer des affaires du Royaume ainsi que bon leur sembleroit. Ils monstrerent dans l'establissement de cinquante quatre personnes, dont ils le composerent, qu'ils ne se soucioient d'aucune capacité, suffisance & experience en eux, pourueu qu'ils y trouuassent de la passion, de l'aveuglement, & de la tuerie: tellement que les plus courtois & les plus ennemis de la Majesté, leur firent les plus capables.* Aussi

Aussi firent-ils a leur entree vn trait digne de notables Conseillers d'Etat; en quoy leur ignorance ne parut pas moins que leur passion, & la seruitude qu'ils auoient deuotie a celuy qui les auoit creez, &c.

A quoy, au lieu d'auoir esgard apres leur sottise & imaginaire degradation de la personne du feu Roy, (auparauant mesme que sa Sainteté y eust touché) & de proclamer promptement vn autre Roy, ou a tout le moins appeller vn Prince du Sang pour exercer cette Regence: ce beau Conseil, fait de toutes pieces, comme vne botte de foin de toutes sortes d'herbes, &c. signé de Marillac, & pour Greffier Senault. Par cette allegation vous voyez que ie n'ay pas tort de hayr le nom de cet homme; & quand vous entendrez ce qui suit, vous mesmes le condamnerez a. Car depuis on ne cessa iamais de poursuire le Pape avec mille impostures, & sur tout des rodomontades, que le Roy b estoit accablé, & que toutes les grandes Villes & les Parlements, grande partie des Officiers de la Couronne, Capitaines & Seigneurs, & entre tous le Clergé estoient vnis avec eux. Qui fut cause de le faire precipiter à publier le Monitoire contre le Roy, cuidant qu'il fust perdu; qui causa vn grand malheur. S'ils en fussent demeurez là, le mal eust esté moindre. Mais voulant esteindre toute la maison Royale, ils pousserent l'affaire tousiours avec la mesme fureur contre la personne de vostre Majesté, & obtindrent vn Monitoire plein d'horreur, vous

F

a Discours de M^{rs}ieur de Neuers.

b Henry

III.

Le Monitoire fut publié le 22. & 23. Iuin à Meaux, le 9. Iuillet à Chartres, & le dernier de Iuillet cette furie d'Enfer partir de Paris pour son cruel parricide.

priuant de vostre Royaume de Nauarre, dignitez & charges, vous declarant indigne, inhabile, & incapable de posseder aucunes Seigneuries, & specialement le Royaume de France; & la publication en fut faite à Nostre Dame, où Michel de Marillac s'y trouue encor signé: & par cette malheureuse fulmination on vouloit estouffer dans vos reins ce grand Roy vostre fils, qui est au iourd'huy le plus renommé Prince de la terre, par les grandes actions qu'il a faites contre tous ceux qui ont entrepris contre luy: & de plus s'enfuiuit le peril que vous courutes depuis à Paris.

Vous m'estonnez de tout ce que vous me dites, dit le Roy, ne peuant conceuoir en mon esprit, comment cela ne s'est point sçeu plustost; & si l'on l'a sçeu, comment on l'a tant souffert. Et le Parlement comment viuoit-il avec luy? Mal, dit le premier President Champigny. Car comme le President le Iay fut député vne fois vers la Roynne, pour luy faire des remonstrances sur le Code Michéau, lequel ie diray par parenthese, que quand il fut rapporté au Palais en la presence du Roy, parlant des Estats composez (disoit-il) de l'Eglise, Iustice, Noblesse, & tiers Estat, il pensoit par cette impertinente nouueauté de proposer quatre Corps au lieu de trois, dont les anciennes Assemblées dans le Royaume ont tousiours esté composées; & mettant la Iustice deuant la Noblesse, establir yn

ordre qui seroit comme enregistré en cette compagnie qu'il pensoit obliger par là. Mais le fruit qu'il en tira, fut, qu'on se mocqua de luy, & que s'estant eschauffé contre la harangue il disoit, Vous m'attaquez, ie vous entends bien. Il est bien aisé, dit le President, car ie parle bon François: luy voulant donner par cette attaque sourde vne atteinte, qui signifi-
oit qu'il ne le tenoit pas pour tel.

De quel Code voulez-vous parler, dit le Roy? A-on adiousté quelque choses aux anciennes Ordonnances? Il me semble qu'elles estoient assez claires, & qu'il ne falloit que les bien observer. Qu'en dites vous Monsieur de Sillery? Lequel respond: Sire, ie vous assure que ie n'y ay peu rien comprendre, & que luy mesme n'a pas entendu ce qu'il a voulu dire, se voyant par plusieurs articles qu'il a eu dessein de renuerfer tout ce qui estoit du passé, pour le reduire sous son caprice sans raison, faisant quasi par tout des ouvertures à ne l'observer point. Toutes les anciennes Ordonnances estoient pour authentifier, faire reuerer & honorer la personne du Roy, estant porté en icelles; *remettant toutes les difficultez, contrauentions, & oppositions, à Nous, pour en ordonner, &c.* où celles-cy euoquent tout au Conseil pour en deliberer & ordonner comme on verra bon estre: qui est en vn mot attirer à soy toute l'autorité, & faire vn Roy de cire, qui ne pourroit agir de pleine puissance Royale sans l'ayde de son

Seau : qui est bien loin de la façon respectueuse, que ceux qui ont possédé nos charges ont tousiours rendu aux Roys. Monsieur de Bellievre ne viuoit pas ainsi avec vostre Majesté.

Alors l'Euesque d'Orleans quittant son Tertullien, qui l'auoit mist tout en eau, prit la parole & dit : Vous n'avez pas tout dit de ce beau Code, lequel non seulement estoit contre la Majesté des Rois, mais encores contenoit des heresies, pour lesquelles aucuns du Clergé avec moy luy declarasmes, que s'il n'y remedioit, nous l'excommunierions avec son liure : & entr'autres, nous luy montrasmes l'article du Concile de Trente, (lequel bien que non receu en la police, pour la foy il l'est par tout le monde) qui defend les mariages clandestins ; luy veut que les Parlements les declarent nuls, par vne attribution de pouuoir iuger des Sacrements, & faire plus que le Concile, quiles defend bien, mais ne les annulle pas ; car *quod Deus coniunxit homo non separet*. Il demeura muet, s'excusa sur son intention, qu'il affermoit n'auoir iamais eu mauuaise, & qu'il y falloit remedier par l'examen qui en seroit fait fort promptemēt. Surquoy fut ordonné le sieur de Bullion Commissaire pour cet effect, qui n'a pas fait de difficulté d'apostiller ces beaux articles, où l'on voit qu'il prononce: Cettuy-ci sera osté: cettuy-là corrigé: on adiousterá tels mots: on changera ceux-cy. En sorte que si on eust

prononcé sur tous, on n'en eust laissé aucun.

C'estoit sa precipitation, dit le President de Verdun, *ore oborto*, qui luy faisoit tout entreprendre de sa teste, ne voulant rien communiquer avec personne, tant il auoit bonne opinion de luy, croyant pouuoir tout faire sans estre blasmé. Et qui ne s'estonna vn iour, le Roy allant au Parlement, de luy voir porter huit Edicts, qu'il n'eut pas le loisir d'acheuer à son logis, & les alla sceller sur l'Autel de la sainte Chapelle, (qui sembloit ne deuoir iamais estre purifié de telle profanation que par le feu qui y a esté mis depuis.) Pour montrer avec combien peu de consideration il faisoit les affaires, qu'il conduisoit plustost avec impetuosité qu'avec raison. Et si ces Edicts, qui se pouuoient tous reduire enttrois ou quatre, eussent esté couchez en bonne forme, le Roy en eust eu contentement, & eust empesché beaucoup de crieries: Par où l'on peut iuger de la difference de scauoir bien ou mal faire les choses. Il vouloit prendre seance par dessus moy au Parlemēt, quand il y viendroit seul: Je l'en eusse bien empesché, comme i'ay fait voir par la fueille que i'ay fait imprimer: & quoy que Ribier puisse auoir escrit au contraire, ie me serois plustost fait tourner la bouche de l'autre costé, que de luy auoir cédé.

C'est parler en homme de cœur, dit l'Advocat Arnaud: Mais puis que vous luy en voulez, comment n'avez-vous point scéu

les discours que nous faisoit Monsieur des Landes, de son entrée au Parlement avec le Roy, pour presenter ce ridicule Code, & afin de persuader & obliger la Cour à le recevoir ? Il commença sa harangue par la maladie du Roy, les secours donnez en Ré; & la cōtinua par la defaite de l'armée Angloise, du retour des deux autres armées, sans aucun effet, du siege de la Rochelle, & de la circonvallation qui y fut faite, du siege de Tyr par Alexandre, de la puissance de la Mer qui ruina sa Digue, de l'antiquité des vaisseaux à feu mentionnez dans Quinte-Curce, pour monstrier que les Rochelois se vantoient à tort d'en estre les auteurs; de l'Ordonnance de Theodose, & Honorius touchât le Nil; du miserable estat de la Rochelle quand elle fut prise; du Traicté qu'elle avoit fait avec l'Anglois; de la ruine de Bizante par l'Empereur Severe, de Limoges par Charlemagne, des gardes du Roy entrées dans la Rochelle plusieurs comme troupes auxiliaires, que conquérantes. Ne font-ce pas preuues pertinentes pour l'autorité de son Code ? Et reconnaissant trop tard son impertinence par la moquerie qu'il appercent qu'on faisoit de luy, il v'sa de menaces par vne infinité d'exemples hors de propos pour faire peur; & en vn mot, dire qu'il estoit iniuste & ridicule, non receuable que par la force. Aussi a-il esté si mal receu, que s'il y avoit Aduocat si hardy de le citer, il seroit sifflé par la Compagnie.

Chacun conclud, qu'à son humeur tout sembloit possible, & qu'on ne s'en estonnoit, veu qu'il n'auoit point eu de hôte de publier & aduoüer la traduction, & ritmes de ses Pseaumes, qui auroient fait iougir tout autre que luy. Alors le Roy imposa silence à tous, voulant sçauoir quelle auoit esté l'issue de l'affaire.

Que le iour de la Saint-Martin (lequel Botru nomma ingenieusement la iournée des Duppes) respond Villeroy, plusieurs croyoient que le Cardinal fust par terre; & ses ennemis s'en resioüissans, les gens de bié en sospiroient, & les Huguenots mesme se desespoient de cet accident. par ce que l'ayant trouué fidelle à leur maintenir ce que le Roy leur auoit promis, ils craignoient de retomber dans les maux dont ils venoient de sortir: Et que comme on taschoit de renuerfer l'Edict de Paix qu'il auoit conseillé, ils n'esperoient que toutes sortes de miseres par son esloignement: C'est pourquoy ils s'affligeoient fort du bruit qui en courut. Et comme le lendemain on veid esclater trois grandes nouvelles, La cullebute du Garde des Seaux, L'establissement en sa place de Chasteau-neuf, & le Iay fait premier President; tout le monde changea de visage, les gais du iour precedent deuindrent Melancholiques, & les affligez recommencerent à rire.

Cela est chose ordinaire à la Cour, dit le Roy, & i'ay veu mille chose semblables; mais

cependant voila vn bon choix : Et Dieu
 vueille que tous ceux qui le feront à l'adue-
 nir, soient semblables: l'Estat en ira de mieux
 en mieux. Le President le Iay fera bien cette
 charge. Pour Chasteau-neuf, il est de ma nou-
 riture. Monsieur de Villeroy, vous sçavez
 que ie vousay dit, il y a long-temps, qu'il
 prendroit vn iour la place de son grand pere,
 de son oncle & la vostre : & dès que ie l'en-
 uoieray en Hollande, pour estre conjoint avec
 le President lanin dans le Traité de la Treve
 qui se faisoit, i'en eus la pensee; sur ce que
 m'estant venu trouuer vne fois sur ce sujet, ie
 cognus qu'il seroit propre aux affaires; & le
 mesme President me l'a tou-jours fort esti-
 mé. Ce n'est pas à tort, respond ce bon Vieil-
 lard, comme il se void par les continuels em-
 plois qu'il a eus depuis : & se peut dire, que
 iamais homme n'est entré en sa place, qui
 aye tant negocié dans les pays estranges.
 Et Bethlen Gabor le remarqua fort bien en
 son Ambassade d'Hongrie avec le Duc d'An-
 goulesme. Il a esté Ambassadeur en Flan-
 dre, en Suisse, Grisons, Venise, Angleterre.
 Bellievre, qui brauement mit l'espée à la
 main dans les Grisons, contre l'Ambassa-
 deur d'Espagne qui le vouloit preceder; & de
 Sillery, qui auoit aussi veu les Pays estranges,
 n'ont pas mal entendu leurs charges, l'un &
 l'autre ayans à la verité long-temps outre ce-
 la esté employez dans les plus grandes nego-
 tiations du Royaume : mais tous les autres,
 qui ont

qui ont eu credy, n'auoient iamais quitté le Palais, cōme Poyet, du Prat. Pour du Bourg, il auoit aussi fort voyagé, respond le President, en riant, car il venoit de Surie quand il fut fait Chancellier. Et ce qui n'empire pas les conditions de cestuy-cy, ce sont deux ou trois années qu'il a eu d'employ & de grande priuauté avec le Cardinal de Richelieu, qui luy ont appris des choses qu'on m'a dit, qu'il confesse luy mesme luy auoir donné de grandes lumieres, qui luy auoient esté incognuës iusques alors.

Tout ce que vous dites est vray, dit Ville-roy: Et j'adiousteray encor ce qu'on escrit, & que ie trouue fort à son honneur & à celuy de son predecesseur, assauoir les lettres de sa charge, portans, Que le Roy n'ayant peu auoir plus long-temps agreables les seruaes du sieur de Marillac en la charge de Garde des Seaux (notez cela) ayant a la remplir de quelque personnage, auquel les qualitez que requiert vn si grand office se trouuaissent au degré de vertu qu'il conuient, afin que nous en ayons non seulement satisfaction, mais nos peuples aussi, & que de son equité & droicture ils puissent attendre & recenoir iustice aux plaintes qu'ils auront a nous faire; & qu'il se fust acquis vne telle experience aux affaires d'Estat, qu'en celles qui se presenteront, nous puissions estre assistez de son conseil. Ce que n'ayant trouuë en personne si eminẽment, qu'en nostre tres-cher & feal, & e. lequel nourry en nostre Parlement & employé dès sa plus tendre ieunesse, dès le Regne de

feu nostre tres. honoré. Seigneur & Pere, en diuers
Ambassades, & depuis pour nous employé aux
plus grandes affaires qui se sont presentees, soit de-
dans ou au dehors de nostre Royaume auxquelles il
nous a dōné des preuues de sa capacité & fidelité,
s'y estant acquis le renom qui conuient à vn Garde
des Seaux, & l'experience pour dignement nous
seruir; Nous n'auens peu jecter les yeux que sur
luy, esperant que son soin & sa vigilance nous ayde-
ra a restablir nostre Royaume en exemple a la po-
sterité: ce qui retournera a la gloire de celuy qui
nous a tousiours conuert de ses asbes.

Voyez, dit le Roy, son oncle le Mareschal
de la Chastre qui pleure de ioie. Qu'on appel-
le le Garde des Seaux de Moruillier, auquel
ce bonhomme disoit que son neneu Charles
ressembleroit, afin qu'il aye sa part de la nou-
uelle. Pour des gens d'espee qui entrent au
Conseil, le Mareschal de Schomberg en est
tousiours, à ce qu'on madit. C'est vn homme
sage dès le berceau, & que i'ay tousiouts ay-
mé. Il y a ie ne sçay quoy d'escriit sur la face
des hommes, qui faict veoir s'ils doiuent estre
quelque chose ou non; & cela ie l'ay leu sur
la sienne, & ie ne me suis iamais guerés trom-
pé en mes iugemens. Et qui a les finances à
cette heure? Le Marquis d'Effiat, Sire, dit Vil-
leroy: & lors qu'on croyoit qu'il fusi sans re-
source, aprestant de despences qu'il a souste-
nuës depuis qu'il est en charge, il a si bien pris
ses mesures, qu'il a entretenu cette guerre, &
en rapporte de l'argent, sans auoir rien enta-

mé sur l'aduanee de l'année prochaine dans pas vne des Receptes generales : qui fait veoir qu'on y procede fidellement. Aussi en a il receu cet honneur, que sur l'instance qu'il a fait au Roy, d'estre deschargé d'un si grand fardeau, offrant son conseil & son assistance à qui que ce fust, qui fust nommé de sa Majesté pour en faire l'exercice ; il luy a commandé expressément de continuer sa fonction, comme le iugeant si necessaire en cette administratiō, qu'il croyoit n'y en pouuoir comettre d'autre sans vn grand interest en les affaires : & à Vigliane ; où les troupes du Duc de Sauoye furent bien frottées par des gens plus foibles qu'elles n'estoient, & encorés à Carignan, où il monstra en l'un & en l'autre, qu'il n'estoit pas moins bon pour combattre que pour le maniement des finances ; dequoy s'est ensuiuy, que pour marque de sa vertu il a esté fait Marechal de France.

N'y a il plus de robe longue dans les affaires, demanda le Roy ? Bullion y est, Sire, respond Villeroy, & y seruira tres-bien, car ie l'ay tousiours cogneu accort & iudicieux. A qui en parlez-vous, dit le Roy ? N'est-ce pas encor vn de ceux de qui ie me seruois le plus ? Le President Ianin n'en sera pas marry. Non Sire, respondit-il ie m'accommodois fort bié avec luy, & auions accoustumé de rire souuent ensemble quand nous estions de loisir, & principalement quand ie luy disois ce demy vers, *Antvūimane petit*. Le vous entends, dit le Roy, & me faites souuenir du *Dio me ne*

garde de ma femme, qui ne fut mal à propos.

Et qui a les despeschés estrangeres ? Boutillicr, Sire, dit Villeroy ; & les fera bien ; car il a bon sens, fidelité & secret ; & de plus dressé de la main du Cardinal, qui ne luy aura pas esté vne mauuaise leçon, Il est fils, dit le Roy, d'un homme de bien, que j'ay cognu sincere, & en voulois faire vn President si i'eusse vescu dauantage. Cela me fait bien esperer de mon fils, de ce qu'il ne prend pas le conseil de Roboan, qui chassa tous ceux que son pere aymoît, pour se jetter entre les mains de gens nouueaux & inexperimentez, qui le perdirent. Il paroist par là que ie ne faisois pas mal, puis qu'on suit mes erres, & qu'on prend tous ceux desquels ie me suis feruy, ou que j'ay aymez pour la conduite des affaires.

Mais ne dit-on rien dans ces despeschés du frere de Marillac ? Ouy, Sire, dit Villeroy, l'histoire en est longue, & tout le monde le blasme de son ingratitude. Car vostre Majesté sçait bien qu'elle n'en auoit iamais fait d'estat depuis le fait de Caboche ; & qu'une fois disnant chez Bastien, disant à tout plein de Seigneurs, Disnost mes enfans, mettez-vous a table avec moy, ils s'y voulut mettre avec les autres ; & vous le fistes leuer, disant que par vos enfans vous n'entédiez pas ceux de sa sorte : & le chassastes du Bac à Saint-Germain, disant, que vous ne vouliez point dans vostre compagnie de gens qui luy ressemblassent ; pour faire voir que vous ne l'e-

Stimiez pas : & a vescu ainsi, iusques à ce que
 le Cardinal de Richelieu luy procura la charge
 d'Ayde de Camp dans les armées contre
 les Princes, & puis la charge de Commissaire
 General de l'armée, en suite la Lieutenance
 de la Compagnie des Gendarmes de la Roi-
 ne-Mere, avec la recompense. Au siege de S.
 Iean il fut fait par son intercession Marechal
 de Champ, & luy fit donner le Gouvernemēt
 de Verdun, la Lieutenance dans le Pays, &
 les moiens de faire bastir vne des plus belles
 Citadelles qui soit en France : Et pour con-
 clusion fut fait Marechal de France à Priuas
 avec des peines indicibles, le Roy vostre fils y
 contredisant, se faschant de refuser le Cardi-
 nal qui l'en sollicitoit ; & neantmoins apres
 l'auoir promis, il fut deux heures sans s'y
 pouuoir resoudre : Et comme il eut fait le ser-
 ment deux iours apres, ayant sujet d'es-
 crire au Cardinal, il le traita simplement
de vostre bien-humble seruiteur : pour mon-
 trer que les honneurs bien meritez auoient
 en vn instant changés ses coutumes. Apres il
 fut Lieutenant General d'armée seul en Châ-
 pagne, où il n'a pas mal fait ses affaires, à ce
 qu'on dit, & pour recompense de ce que des-
 sus, luy & sō frere ont voulu ruiner l'auteur
 de leur bonne fortune, comme il ne peut
 s'empescher de le temoigner partant de Ver-
 dun, disant, Il y a long-temps que mon frere
 & moy luittons contre le Cardinal, mais j'es-
 pere qu'à ce coup nous le porterons par ter-
 re ; & son frere a esté veu sombre & morne

dans tous les bons progresz d'Italie, comme
 ces Medecins, quand ils ont iugé quelqu'un
 à la mort, pour la reputation se desesperent
 s'il guerit. Et fut remarqué par plusieurs per-
 sonnes vne ioye incroyable, quand il sceut
 dans le Seau, la prise du Mantouë, qui luy ré-
 plit le visage de gayeté lumineuse, & avec vn
Nous en verrons bien d'autres. Et si on m'eust creu!
 Il appella tous les Secretaires qui auoient des
 lettres rebutées, & les fit apporter, & les scella
 toutes, pour par ce moyen faire les feux de
 ioye d'une si bonne nouvelle, estant de cette
 humeur, de vouloir auoir vne iustice & vne
 raison à sa mode: car ce qu'il faisoit n'estoit
 pas parce qu'il sembloit ainsi aux autres: mais
 parce qu'il estoit porté à cela par sa fantasie,
 n'ayant iamais esté de l'opinion de la compa-
 gnie, mais voulu tousiours que tout le mode
 fust de la sienne, au surplus deuenu si fier,
 qu'il sembloit que comme vn lion il deust de-
 uorer tout le monde, offensant vn chacun
 doublement du refus & de la maniere qu'il
 y apportoit, montrant bien qu'il auoit mal
 estudié la Pratique de Messieurs de Chierny
 & de Sillery, qui adouciſſoient les mesconté-
 temens de ceux qui perdoient leurs causes,
 par des paroles douces & ciuiles, qui empes-
 choient le desespoir, que donnoit cettui-cy,
 deuenu inaccessible à tous ceux du Conseil
 mesme, se tenant souuent renfermé, escriuant
 tousiours de mauvais memoires, & faisant
 des lites, qui reüssiſſoient si mal, que Toirax
 en fit pendre vn publiquement & brusser a-

pres pour la faulſe monnoye qui eſtoit con-
 tenuë dedans : & ce qui eſtoit de pis, c'eſt
 qu'il ne rendoit point iuſtice, eſtant perpe-
 tuellement dans les cabinets de la Royne, où
 il auoit cette ruse d'entrer de bõ matin, pour
 faire voir qu'il auoit grand credit : & com-
 me on le voulut deſcouurir, on trouuoit qu'il
 entretenoit deux ou trois heures les femmes
 de chambre : & puis quand on l'appeloit, il
 ſe trouuoit qu'il n'auoit rien à dire, qui en vn
 autre temps l'eut fait trouuer importun &
 faſcheux, ne laiſſant pas de continuer pour
 payer le monde de ce luſtre, qu'il manioit les
 cabinet à ſa mode, faiſant plus d'eſtat d'un
 garçon de chiens que d'un Maiſtre des Re-
 queſtes : & cependant qu'il s'amuſoit à ces
 bagatelles, les pauures parties languiſſoient,
 le maudiſſant de ne pouuoir eſtre expediées,
 & demeurer ruinées en la pourſuite de leurs
 affaires : Et cela n'eſt rien au prix de ſon pro-
 ceder, quand le Roy ſ'en alla à ſainct lean de
 Morienne, diſſuadant tous ceux qu'il ren-
 controit de le ſuiure, luy qui s'expoſoit en
 toutes ſortes d'incommoditez, pour teſmoi-
 gner qu'il n'y a rien de plus cher que l'hon-
 neur de ſon Eſtat : & cet homme avec vne
 tendreſſe de crocodile, proteſtoit publique-
 ment contre ce conſeil, duquel il ſommoit
 vn chacū de ſe ſeuuenir qu'il ne l'auoit point
 donné, augurāt toutes ſortes de mauuais pré-
 ſages pour en deſcourager tout le monde : &
 au retour il ſe mit à genoux deuant le Roy,
 teſmoignant avec vn viſage fumant de zele,

le contentement qu'il auoit de le voir eschappé d'un lieu où il luy pouuoit arriuer toutes sortes de defastres; & avec ceste ioye spirituelle on remarqua, qu'en la maladie du Roy, où tout le monde fonde fondoit en larmes, il n'en versa iamais vne seule.

Fiez vous en ces hypocrites, dit le Presidēt Ianin. Par le Corbieu ie les ay tousiours haïs. N'en parlons plus, dit le Roy, ie veux sçauoir des nouuelles d'Italie: Ie vois le Strigio, qui nous en dira. Et bien Marquis, vous avez perdu Mantoüe? comment cela est-il arriué? Sire, respondit le Marquis, *Sic erat in fatu*: car avec tant soit peu de resolution on pouuoit euitier ce malheur. Mais comme le Duc auoit naturellement le don d'incertitude au choix des choses qui luy estoient necessaires, il m'a rendu prophete à mon tres-grand regret, luy ayant plusieurs fois dit, qu'il valoit mieux auoir vn Estat gasté que perdu, qu'il falloit quitter toute conuiuence pour aller au solide & au certain, ou autrement qu'il se verroit biē tost despouillé de ses Estats. Ses peuples luy estoient mal affectiōnez, & il pensoit avec le temps les gaigner, & en les espargnant il s'est perdu avec eux. S'il eust sceu se seruir des biens qui estoient dās sa ville, leuer des hommes, faire venir des François de l'armée Venitiēne, qu'il craignoit & apprehēdoit plus que les Allemans pour son malheur, il auroit euité beaucoup de maux, & avec cent mille escus qu'il pouuoit prendre sur les siens avec raison, il auroit euité (chose prodigieuse) vn

fac de cinq millions d'or ; & la ruine entiere de tout son peuple avec la sienne, causee par ces furieux animaux qui ont figure d'hômes, mais tout à fait bestiaux, ayans foulé aux pieds la Religion & tout ce qu'il y a de plus sacré, pour le prostituer à leurs furieux appetits ; qui a fait voir le zele de ceux qui les ont enuoyez tous heretiques, afin de rendre leur crime plus grand deuant Dieu qui tost ou tard leur demandera compte de tant de desordres, dont ils sont les auteurs ; comme du sang d'un milion de Vierges violees & egorgees, avec vne barbarie sans exemple.

Et les Princes d'Italie qu'ont-ils dit à cela ? dit le Roy. Rien, Sire, respondit-il. Car Florence est tout Espagnol, tant que la Mere & le Côte d'Or se viuront : apres, ie n'en respôdrois pas, si on garde vne entree en Italie, car ie scay qu'il aime fort vostre fils. Pour Parme, c'est vn ieune homme qui n'oseroit respirer iusques à ce qu'il voye que les François ayent les Alpes derriere eux : en ce cas là, il n'est pas hors d'esperance de pouuoir estar aussi bon François que le Duc de Castres, de sa Maison, l'a esté pour vn temps.

Et les Venitiens, dit le Roy ? Ils ont voulu hors de temps exercer leur prudéce, respond le Marquis. Car pour ne se vouloir pas déclarer comme ils denoient, voyant les François en Italie, autant pour leur liberté que pour celle des autres, ils ont laissé perdre Maniôue, pouuant quatre mois au parauant chasser les Allemans d'Italie, qui ont esté long temps foibles : & comme ils ont voulu temporiser, ils ont auancé leur ruine : car s'estant

depuis fortifiez de nouuelles troupes, ils furent faire vne furieuse attaque à Maringo & Villebonne, où les bons Seigneurs ne se trouuans pas respectez comme à Venise, ils furent contrains de faire retraicte en telle sorte, que qui n'eust sceu ce qu'ils faisoient, certes on eust dit qu'ils eussent fuy: & le malheur fut, que deux mille cheuaux qu'ils auoient voyans venir en ordre les Allemans, qui n'estoient que mille, poursuuians leur victoire, ne s'auiferent iamais de les charger, pour n'auoir pas eu, disoient-ils, le commandement, lequel ils allerent chercher à toute bride à Valaize: ou ayans assemblée leur conseil, ils suivirent l'aduis du Comte Scot, lequel, disoit-il, *so ben che sacra vituperoso ma pure fara utile à la Serenissima Republica*: lequel fut de quitter la place, & à sauue qui peut, gagner Pasquiere. Ce qui fut brauement executé, en attendant avec impatience les diuertissemens du Turc en Hongrie, pour occuper les Allemans, & diuertir ces desseins d'hommes bestiaux, & qui ne laissent nulle meschante à commettre.

Mon fils a pris bon conseil dans la resolution qu'il a faite, dit le Roy: car veu ce que i'entends dire, Casal estoit pris avec Mantoue, & les Grisons. Et cela estoit le chemin, à quoy les Espagnols tendent, il y a long temps, d'vnir l'Allemagne à l'Italie; auquel cas tous les autres Princes estoient en grand hazard: & m'estonne que pour s'y opposer toute la terre ne s'vnit avec mon fils, qui a eu de grandes raisons d'entendre cette guerre, avec laquelle il a cogneu & preuenu le

mal; & sans laquelle les Venitiens eussent couru grande fortune (s'ils n'eussent point eu d'amis armez) d'estre reduits à la pitoyable harangue qu'ils firent à Maximilian : N'y ayant point de doute qu'ils pouuoient estre despoillez de toutes leurs places en terre ferme; & leur grande ville, priuee du prin qu'ils en reçoient, eust bien tost suivy le chemin des autres.

Qu'est deuenue ce braue General qui les a si bien seruis, & comment s'appelle-il ? Sacredi, respond le Marquis, qui a esté demis de sa charge & emprisonné.

Le Roy soupirant du peu de preuoyance qu'auoient eu les Italiens, pour s'opposer aux maux qui les approchoient de si près, voulut sçauoir ce qui auoit renssi du Traicté de Ratisbonne. A quoy Villeroy respondit, que plusieurs l'auoient trouué mauuais, pour le zele qu'ils auoient à la grandeur de l'Estat, & les autres, pour n'aymer pas la paix au dehors, encores qu'ils eussent publié auparauant, qu'ils en brnssoient d'enuie. Et ayant veu, n'y a pas long temps le Duc de Monteleon sous vn Ciprez tout pensif, il seroit bon de le faire approcher, car il est homme candide, qui dira franchement ce qu'il en peut auoir appris, n'estant pas chose bien expliquée dans les depeches que i'ay.

Alors ce Duc estant appelé, & enquis de ce qu'il en sçauoit: il tesmoigna que d'entrer en ces discours cela luy estoit douloureux, par vn profond soupir & vne grande melancholie qui luy en parut sur son visage, & refrongnant ses sour-

cils dit au Roy : Sire , *Infandum iubes resnoare dolorem.* Je me ressouviens que du temps que i'estois en France, ie fus vn iour visiter le sieur Arnaud, ce fameux Aduocat, pour conferer avec luy sur les oppositions de Bourdillon en Piedmont, & les remonstrances du Duc de Neuers, pour sçauoir s'il auoit trouué assez de vigueur en l'vn, & de raison en l'autre. Je vis sur sa cheminee ce Distique,

Versis lugebit Iberia fati.

Mis à l'imitation de Virgile; par lequel ce Poëte celebre representoit vn Prince de la race de Priam, qui par vn don de prophetie, ou plustost par vne profonde science d'Estat cognoissoit l'instabilité des choses humaines, consoloit Enee, en predisant, que les destinees de la Grece, ennemie des Troyens, seroient en fin changees, & qu'on verroit vn iour le chastiment merité, qui se feroit par quelqu'vn de sa posterité. Sur quoy dès-lors il me tomba dans l'esprit, que voyant tant de vertus en vostre fils dès sa ieunesse, il pourroit accomplir ce prognostic; & que depuis ils'estoit tousiours enquis du cours de sa vie pour verifier sa creance: Et qu'ayant entretenu Collalto de ce qui se disoit (quand il quitta la vie) de ce Traicté, dequoy il sembloit que quelques vns des leur en auoient de la ioye, & autres s'en attristoient; ie le priay instamment, comme bien informé qu'il pouuoit estre, de m'en dire son sentiment. A quoy il me respondit d'Italien à Italien, comme conuenans d'inclination, de preferer sagement la

conseruation de la vie à la vanité : Qu'il estoit
 vray, que depuis la prise de Mantouë (qui l'a-
 uoit chargé de despouilles) ayant resenti que ses
 poulmons se remplissoient tous les iours d'une
 defluxion, qui le faisoient iuger qu'il estoit prez
 de la mort, il auoit pensé de faire vne honneste
 & seure retraicte, pour s'oster de la foule, &
 des combats importuns à son humeur : qui l'a-
 uoit porté plusieurs fois à supplier l'Empereur de
 luy donner congé : Et que si d'aduenture le
 dessein qu'il auoit n'eust esté cogneu de tout le
 monde, & que la maladie ne l'eust si fort pressé,
 il eust creu ne pouuoir, sans regret, voir que les
 François firent la paix les armes à la main, si celle
 de Ratifbonne ne les eust mis hors de peine de
 consulter, s'il estoit plus auantageux de s'expo-
 ser au peril d'une bataille, que de laisser la cam-
 pagne libre à leurs ennemys, qui s'approcherent
 si prés des retranchemens, que les Espagnols ne
 refuserent pas tant d'entreprendre de les en-
 esloigner pour la crainte de la mort, (car il n'y
 a point de doute qu'ils ne soient fort vaillans)
 que pour le desplaisir qu'ils eussent peu rece-
 uoir, en se retirant vn peu viste, de faire tort à
 leur grauité. Et quant à luy, qui regardoit plus
 le solide que l'apparence & le fast des demarches
 des gens de guerre, il disoit sincerement; que
 puis que l'Empereur, faisant la paix sans atten-
 dre le responce d'Espagne, a tesmoigné qu'il
 vouloit preferer les interests qu'il a dans l'Alle-
 magne pour la Religion & l'Estat, aux entrepri-
 ses peu heureuses des Gouverneurs de Milan, il

est croyable, que cette Monarchie affectée par les Espagnols sur les autres peuples, sera bornée au Fort de Fuentes, & que par le secours de Casal, ils doivent avoir perdu l'esperance d'Italie, dont ils pensoient, suivant l'exemple des Romains, estendre leurs limites au delà de la ligne qu'ils ont designee pour les conquestes de la terre, comme pour celle de la mer.

Dans ces discours de Collalto i'apperçeus bien qu'il estoit tout chagrin, d'auoir si peu iouy du fruit de sa proye. Et comme il m'eut laissé, ie rencontray Villani, qui me donna vne grande relation de tout ce qui estoit sur le tapis au temps de son partement, enuoyee, à mon aduis, par quelqu'un de l'autre monde, tres-bon Italien, mauuais Espagnol, & qu'il ne hayt pas les François. Je ne liray seulement que ce qui regarde ce dont vostre Majesté a voulu estre informee, qui est contenu en cet article.

Et quant au traité qui s'est fait en Allemagne, il me semble que c'est le prelude de la Comedie qui s'est iouee deuant Casal, laquelle est vne des rares pieces qui aye paru d'as iours les siecles passez; estant chose assez plaisante & peu commune de voir Mazarini sortir d'une tranchée à l'improuiste le chapeau à la main, & porter à toute bride la paix aux François, qui venoiēt pour enfoncer le Camp tout en la mesme sorte, comme s'ils eussent couru au faquin: & de voir en suite les Chefs de l'armée Imperiale, & Espagnole s'auancer au grand pas hors de leur Camp, pour embrasser avec ioye les chefs François: & tel-

moigner leur zele Catholique, d'espargner le sang des Chrestiens. le sçay de bon lieu, quen la la Diette plusieurs personages diuers estoient montez sur le theatre pour commencer le ieu, & preparer l'attention des spectateurs: d'une part l'Empereur auoir protesté sans feintise sa bonne intention pour le repos public: & contraignant son naturel, auoit rabroué en colere l'Ambassadeur d'Espagne, qui vouloit qu'on ne conclud chose quelconque, & que tout l'Vniuers demeurast en suspens pour attendre le retour de son courrier qui n'auoit ordre de partir qu'après la prise tant desirée de Casal: comme si le premier mobile deuoit arrester son cours, & n'auoit point de mouuement sans les influences du Conseil de Madrid. D'ailleurs, les Electeurs Catholiques estoient sur le point de passer pour fauteurs d'heresie, au iugement des Espagnols, parce qu'ils ne vouloient pas estre despouillez par eux comme le Palatin: qu'ils sont prests toutesfois de releuer du ban de l'Empire, voire misme de le canoniser pourueu qu'il le laisse iouyr de ses biens; & que comme vn bon Chanoine, il se contente d'une pension reguliere: & feroient bien la mesgrace aux autres Princes, s'ils vouloient estre aussi simples & gens de bien que le Duc de Pommeranie, qui en beuuant laissa paendre son Estat au Vvarestin General de l'armee Imperiale, & qu'ils abolissent la Ligue Catholique, indigne de ce beau tiltre, puis qu'elle n'est qu'Allemande & non pas Espagnole. Il est arriué pourtant que le contre-coup de tant de desseins est tombé

sur le pauvre Vvalestin, lequel s'estant aduancé à Meninghen, pour tourner teste vers l'Italie & la France, qu'il menaçoit de couvrir de gens de guerre, s'est trouué dans vne matinee desmis de sa generalité, & s'en est retourné en Boheme pour contempler la vanité du mode, & mediter de plus prés, & au propre lieu, d'où le Palatin fut chassé en vn iour, que comme luy il auoit perdu en vne heure par ce bannissement la possession qu'il auoit prise de la Duché de Mechelbourg. L'Ambassadeur de France changea souuant de contenance: car au commencement il fit voir, que le Roy son Maistre ne s'estoit iamais esloigné d'une Paix raisonnable, pour iustifier ses actions & son procedé. Mais comme il recogneut que les Espagnols traïsnoient les affaires en longueur, pour l'esperance qu'ils auoient de prendre Cazal, trauaillez de plusieurs incommoditez, il temoigna publiquement, que s'ils ne se contentoient des conditions, desquelles on auoit parlé de part & d'autre en Italie, sans rien conclure par leurs tergiuerfations & incertitudes, qu'il estoit resolu de s'en retourner: & se preparant pour cet effect, tous les gens de bien l'arrestèrent, l'Empereur mesme, les Electeurs & le Nunce, le coniurans de considerer ensemble les moyens plus propres d'appaiser le cours de ceste longue guerre: que le sang respendu dans vne bataille auroit dauantage allumee comme l'huile iettée sur les charbons accroist de beaucoup leur ardeur.

Surquoy il se rencontra, que, comme souuent
l'Espagne

L'Espagne se sert de Religieux, il s'en trouua vn François, qui selon sa condition prit le party de la Paix, estant mestier de Moine : & telles gens n'ayant rien à perdre, s'ils ont quelque talent de bonne intention & d'experience, ils hazardent quelquefois des conseils que d'autres n'oseroient tenter, comme a fait cestuy-cy, qui sous son long chaperon & sa grosse corde a donné le Moine aux Espagnols en ceste affaire, où il se trouue que le Roy de France a secouru Casal par force & sans péril, son armée n'ayât pas moins de gloire par l'approche qu'elle a fait de ses ennemis, que si elle eust gagné la bataille. Et que les Ducs de Sanoye & de Mantoue peuuent esperer r'entrer dans leur bien. Mais comme le Roy Tres-Chrestien a rehaussé d'une main son allié, & aüec luy tous les amis de sa Couronne : de l'autre, il a tellement abaissé les Espagnols, qu'il semble les auoir conduits sur vn penchant, & estre en son pouuoir de les faire tourner au bas de la roue de la fortune : estant aujourd'huy en estat d'estre l'arbitre des differents de la Chrestienté; pour l'interest qu'ont tous les Princes de s'appuyer du costé où l'on voit regner la Iustice & la sincere protection des opprimez, pour se garantir des violences & des vsurpations, dont, à mon grand regret, chacun se plaint, & que ie suis contraint d'auouer par la force de la verité : ayant de nouveau sur le cœur le desplaisir, de voir que dans l'Italie il n'y a point de borne à l'ambition des Espagnols, qui depuis six mois ont obtenu de l'Empereur, que les vrayz heritiers de Piombin,

place importante, pour le voisinage de la mer, en fussent entierement priuez, pour en inuestir le Roy d'Espagne, comme d'un fief de l'Empire; à charge de le remettre par infeodation subalterne & dependante du Roy Catholique, à celuy qui luy semblera estre le plus legitime successeur: c'est à dire, à celuy qui luy sera plus affidé partisan. Ainsi sans les François, le Duc de Mantoue, & les autres Princes d'Italie, se fussent contentez peut-estre, de ce qu'on appelle maintenant entre les sages yne Piombade, qui est vn droict nouveau, pour oster les Estats à vn Prince en faueur d'Espagne, à la charge d'en dire grand mercy, pourueu qu'ils leur en rendent vne partie; selon la courtoisie que l'on faict aux passants que l'on volle dans vne forest, de leur donner dequoy payer à la premiere hostellerie.

Je suis asseuré, dit le Roy, que ce n'est pas Ekemberg qui a faict cette relation, car il est trop Espagnol. Non, Sire, dit le Duc, il ne l'est pas naturellement, mais par accident: car il est tellement hay par tout l'Empire, que s'il n'auoit cet appuy il seroit perdu: & ainsi il faut qu'il finisse en cet estat, parce qu'il n'a point d'autre remede qui luy puisse soulager les eternelles gouttes qui le tiennent attracqué dans vn liét; faisant les affaires avec grãde adresse & esprit, ayant peu de pareils au monde: mais il est si caché & couuert, qu'il est mal aisé de penetrer son intention, ayant continuelles douceurs & belles paroles à la bouche; mais au reste si obscur, qu'il faut vne bõne lanterna pour voir ce qu'il veut & ce qu'il pense. Il est

Italien couuert de nature, & y ayant adiousté l'art il s'y est tellement habitué, que ie crois qu'en ses prieres mesmes Dieu seul peut entendre ce qu'il veut dire.

I'ay pris grand plaisir de vous ouyr, dit le Roy, mais encores ne suis ie pas content: car comme ie vous tiens pour bon Italien (& en disant cela ie dis beaucoup) ie veux sçauoir de vous vostre sentiment de la France. Sire, respondit il, ie sçay qu'Antonio Perez a dict auresfois à vostre Majesté, qu'il estoit certain que les François n'auoiēt point de pareils en courage; mais que si on y pouuoit adiouster trois choses, *Roma, la Mer, y el con-sejo*, ils seroient pour conquerir toute la terre. Pour le Pape, entendu sous le nom de Rome, il s'est porté en sorte, que les deux partis s'en peuvent louer: Pour la mer, la dispute qui est de long-temps entre le Duc de Guise, & le General des Galeres, empesche que le Roy vostre fils ne soit assez puissant de ce costé-là, pour tenir la coste de Genes en sujection, & rendre difficile les communications d'Espagne en Italie. Ce qui est vn extreme preiudice à la France, pour agir en cet endroit, comme il seroit tres auantageux, si on le faisoit, & si on y pouuoit mettre vn aussi bon ordre, que le Cardinal de Richelieu a fait en la mer de Ponant, le Roy vostre fils feroit trembler tout le monde.

Pour ce qui est du Conseil, si le lieu où ie suis ne m'empeschoit de croire les fables des Anciens, ie n'estimerois pas seulement que l'Amo du Cardinal Ximenes, fondateur de la puissance

d'Espagne, fust entree dans le corps du Cardinal de Richelieu ; mais ie croirois aussi qu'au contraire, ainsi que le Gerion des Poetes auoit vne ame dans trois corps, qu'en celuy de ce Prelat François les esprits de ces trois Cardinaux, Albornoz, Mendoza & Ximenes, y seroient diuinement infus; tant on voit reluire en ses actions tous les plus rares traits de prudence & de sage gouvernement, qui a bien paru, en ce qu'il a tousiours conioint la negotiation avec la guerre, l'vne desquelles nuit à l'autre, pour ceux qui ne scauent pas s'en ayder avec vne egale adresse. Ne s'estant point veu, que pour auoir recherché les moyens raisonnables de Paix, cela luy ayé fait relascher en sorte quelconque le soin de maintenir les armées en bon estat : & de surmonter toutes les difficultez de la peste, des saisons, de la situation des lieux, de l'incommodité des viures, comme Collalto me l'a raconté, qu'il a veu à ses despens & avec admiration: m'ayant confessé ingenuement, que sans les diuers artifices, dont ils vsoient tous de leur costé, sous prétexte de limitations & renocations de pouuoirs, & autres tels ambages, le Cardinal pressoit les affaires avec telle vigueur, lumiere & sincerité, qu'en peu de temps elles eussent esté terminees, si lon eust autant cherché le repos de la Chrestienté, & celuy de l'Italie, qu'un peu de fumée, qui a faict pleurer Spinola en mourant, tant elle luy donna dans les yeux.

Je ne mennuoyerois iamais d'ouir parler le Duc de Monteleon, qui a conserué tousiours l'affec-

tion de ses ancestres à la Couronne de France, dit le Roy. Mais d'où vient cette melancholie que vous avez eue en m'abordant? Des pensees facheuses que j'auois de l'Italie, respondit le Duc, d'où ie ne puis iamaïs parler, que ie ne sois remply de douleur, veu le miserable estat ou ie l'ay eue reduite sur l'approche des deux armées deuant Cazal: ou, comme Lisander disoit dans son repas deuant le combat, *Faisons bonne chere à cette heure, car nous souperons peut-estre tous en Enfer*: Ainsi pouuoient ils dire deuant la bataille, dont le gain de quelque costé qu'il eust esté, eust changé entierement la face de ces Pays-là: mais bien plus, si la victoire eust esté du costé des Espagnols. Car il falloit s'asseurer lors, qu'il n'y auoit plus de Princes en Italie, autre que le conquerant, qui en eust changé l'autorité, les loix, & les mœurs. Et cela n'entre iamaïs en mon esprit, que ie ne l'aye saisi d'horreur: & c'est ce qui m'a donné ceste mauuaise grace que j'ay eue en arriuant.

Après cela, le Roy voulut estre informé par Villeroy, de l'Estat d'Angleterre & de la Hollande: qui luy dit, que les affaires n'alloient pas avec la vigueur, comme du temps que le gouuernement estoit entre les mains d'une femme, qui se monstra si amie de la France, & ennemie de l'Espagne, qu'elle ne voulut iamaïs se separer de l'un, ny faire la paix avec l'autre. Auourd'huy il semble que ceux-cy ne sçauent faire la paix ny la guerre: ils attaquerent la France sans suiet, & mal leur en prit: aussi de mesme, firent-ils la paix

sans raison, au temps qu'ils l'a conclurēt : qui ne laisse d'en faire esperer de bons effets maintenāt, sils sçauent bien se seruir du tēps : Mais ils ont oint de grands obstacles, par le Traitté qu'ils ont faict, duquel ils ne reçoient aucun fruit que des paroles, & hazardent beaucoup, en accordant l'entree libre de leurs ports, à certain nombre de Vaisseaux Espagnols : qui est, cōme s'ils recueilloient dans leur sein, durant les rigueurs de l'hiver, des viperes ; qui estans reschaufez, sans auoir esgard à la courtoisie, ne laisseroient de faire ce qui est de leur naturel. Ainsi deuoient ils apprehender l'approche de ces gens là parmy eux, parce qu'estans perpetuellement dans les menées, ils enflammeront avec mille artifices, les haines de la Religion dans les Prouinces : & ceux qui sont violentez dans leurs consciences, s'esueilleront & chercheront les moyens de secouer le ioug, & de porter la confusion par tout : Non pas pour le soustien de la Religion, car les Espagnols seroient bien marries, que ces pays-là fussent conuertis, pource qu'ils perdroient le pretexte de les empieter comme heretiques, ce qu'ils feront toutes les fois qu'ils pourront, parce qu'ils ne manqueront iamais de rompre la Paix quand ils auront occasion commode de faire la guerre.

Pour les Hollandois, on dit bien que le Prince d'Orange est d'un naturel mol, qui ayme le repos, & qui voudroit iouyr sans plus de trauail du fruit de ses victoires passees ; se plaissant dans la douceur de cette bonne renommée qui le rend tres-glorieux. Toutesfois comme il est accort, &

Ceux qui gouvernent, sages; ils iugent bien, que la demande que les Espagnols font de la paix, est plus par impuissance que par bonté; parce qu'estans occupez en tant de guerres, les forces leur manquent pour les Pays bas, & pour la defence de leurs Indes, dans lesquelles, si on continue de faire la guerre, c'est ruiner l'Espagne, luy coupant les nerfs par lesquels sa grandeur subsiste, & toutes les autres puissances languissent, & en fin perissent. Ils se souviennent que la derniere trefve qu'ils ont faite a esté la ruine de tous leurs alliez en Allemagne, ayant donné moyen à l'Empereur, n'estant occupé ailleurs, de leur courir sus & de les enuahir: & si on la refaisoit à ceste heure ce seroit luy facilliter l'acheuement de ce qui reste: parce qu'on y emploieroit l'argent d'Espagne qui se despense en Flandres.


Ainsi ils ont bien plus d'auantage en la guerre qu'en la paix; estans bien asseurez, que l'Empereur n'ayant point l'argent d'Espagne ne remuera rien: Pour ne vouloir pas consumer son bien, qu'il aymera mieux conseruer à ses enfans, que de l'employer pour l'aduantage des autres.


Comme le Roy estoit attentif à ces discours, il apperceut de loing Bonneuil, qui venoit courant, pour arriuer à luy; & avec vne ioye extreme il s'escria, Voicy Bonneuil: Nous scaurons des nouuelles fraisches: & lors il commença de l'embrasser, & luy demander s'il y auoit long temps qu'il estoit party. Fort peu, Sire, dit il en riant: car de la Comedie où i'estois Mardy en fort bonne santé, ie n'ay mis que cinq iours à venir icy.

Et bien, dit le Roy, en quel estat auez vous laissé la Cour ? Alors Bonneuil regardant deux ou trois fois autour deluy, & derriere, respondit, Je supplietres-humblement vostre Majesté qu'elle me pardonne si ie ne parle haut : car i'ay esté tant de fois brouillé, que tout me fait peur en ce lieu où ie suis nouveau venu : & aussi que les personnes de qui i'aurois à parler sont si puissantes, que ie ne me puis fier qu'en vous pour en ouvrir la bouche.

Alors le Roy licentiant la compagnie iusques au lendemain, prend Bonneuil par la main & l'emmene dans vne grande allée couuerte, sans qu'on aye encore peu rien apprendre de la matiere de laquelle il l'entretenoit.

FIN.





C

(227)

fe

